

M359: Rudolf von Ems: Weltchronik (Z)

0,1800 Man vindit ovch i- India .
0,1801 Pantier . vn- tygres dvi sint da .
0,1802 das Pantier lept i- solher art
0,1803 das siechvi tier vf sine vart
0,1804 werdent i- vil kvrzer stvnt
0,1805 von der reinikeit gesvnt
0,1806 die sin aten z allir zit
0,1807 i- svezes smackis sveze git
0,1808 wand ez enkeine spise zert
0,1809 andirs . wa-d das ez sich nert
0,1810 mit den reinistin wrzen gar
0,1811 die dvi erde ie gebar
0,1812 i- dem lande . vn- anderswa .
0,1813 i- Ganges dem wazzer da
0,1814 gant aele groz . vn- niht ce kranc
0,1815 die drizig fveze lanc
0,1816 sint . als vins dvi warheit seit
0,1817 das selbe wazzer slangen treit
0,1818 die groz vn- Egebere
0,1819 sint . si hant krebzen schere
0,1820 sehs klafter lanc . vn- groz irkant
0,1821 ez ist enkein helfant
0,1822 so starc . so groz si ziehin in
0,1823 zvoz in i- daz wazzer hin
0,1824 svndir danch vn- ane wer
0,1825 dvi selbin Indischin mer
0,1826 ovh alse groze snecgin hant
0,1827 so si vz ir hvisirn gant
0,1828 vn- dvi belibent lere
0,1829 so machent iehent dvi mere .
0,1830 die lvete dr vz ir hvsgemach
0,1831 vn- hant hvs vn- obedach
0,1832 i- dem snecken hus genvog
0,1833 das vf im e der snecge trvog
0,1834 Das lant i- India gebirt
0,1835 von acsteinin der dr inne wirt
0,1836 als ein groz hoch gebirge wit
0,1837 d' zwickit an sih z allir zit

0,1838 dc Isin vbir des meres tran
0,1839 gewerliche . vn- an allin wan
0,1840 ist ovh alda der adamas .
0,1841 der ist der art als er ie was
0,1842 das er dem acstine
0,1843 benimt algemeine
0,1844 sine tvgint swa er ist
0,1845 ovh mag in ze keinir frist
0,1846 zerbrechin niht wand bockis blvot
0,1847 er ist ze manegin dingin gvot .
0,1848 dvi mir niht rehte sint bekant
0,1849 nv gat dvrh Indiam das lant
0,1850 ein wazzir heizit Indvs
0,1851 von dem geschribin stat alsvs
0,1852 vn- tvot dvi warheit vins gewis
0,1853 das Indvs vn- Tygris
0,1854 dvi wazzir ein lant scheidin da
0,1855 das ist geheizen Parchia
0,1856 da drizic lande inne lit
0,1857 mit svndir namen groz vn- wit
0,1858 alse das lant aretvsa
0,1859 das lit i- dirre marche alda
0,1860 vn- manic andir riche lant
0,1861 das hie dvi schrift niht hat gena-t
0,1862 Assiria ist ovh da gelegen
0,1863 das assvr der riche degen .
0,1864 Semis svn . ein wiser man
0,1865 stifte . vn- bi der zit hvop an
0,1866 dar sidir eiginliche
0,1867 dvi witen kvinicriche
0,1868 diendin i- dein landin da .
0,1869 Persia . vn- Media
0,1870 ligint in dein lantmarchin
0,1871 da sidir die Monarchin
0,1872 i-ne waren sezhaft
0,1873 der gewaltes herschaft
0,1874 vil nah al dvi erde
0,1875 i- dienstlichin werde .
0,1876 iensit mers do zinstin sich
0,1877 ein andir lantmarche vn- strich
0,1878 vahit an Tigris gat
0,1879 vnz an Evfraten . das hat
0,1880 witer kvinicriche vil
0,1881 der ich ein teil hie nennin wil
0,1882 zwiscent dein zwein wazzirn da
0,1883 lit Mesopotamia
0,1884 dar inne dvi groze Ninive
0,1885 von der ich han gesprochin e

0,1886 an dirre lantmarche lit
0,1887 Babylonie . z einir sit
0,1888 dar an lit Caldea
0,1889 arabia . vn- das lant Sabba
0,1890 das stifte Sabba bi dein tagin
0,1891 von dem ir mich e hortent sagin
0,1892 des vater Camis svn hiez Cvs
0,1893 da vindet man das wihe Thvs
0,1894 das wir nv heizin wiervoch
0,1895 an die lantmarche stozet ovh
0,1896 Oreb der berc . vn- Synai
0,1897 dein sint gesezen nahe bi .
0,1898 die frechin Moabitin .
0,1899 Idvmei . vn- ammoniten
0,1900 Sarracine . vn- Madianiten
0,1901 vn- da bi z einir siten
0,1902 die wildein Elamiten
0,1903 di bi dein selbin ziten
0,1904 do warin niht . si wurdin sidir
0,1905 vn- liezin sih mit bv da nidir .
0,1906 Alse noch flvizet vn- vloz
0,1907 Evfrates das wazzir groz
0,1908 vnz an d' miteln erde mer
0,1909 sitzet manigir lande her
0,1910 dc groze kvinicriche wit
0,1911 Syria da zwiscent lit
0,1912 antyoche . vn- Damas
0,1913 der dannoch dekeinis was .
0,1914 do si sich nider liezen da .
0,1915 fenix . vn- Gomagena
0,1916 stozent dr an . das sint zwi lant
0,1917 rich . vn- groz . vn- wite irchant
0,1918 da lit ovh Thyrs . die Thyrs
0,1919 der von Iaphet geborn was
0,1920 mit Namin stifte schone .
0,1921 vn- Sydonie dvi von Sydne
0,1922 Canaanes Svne gemachet wart
0,1923 an dirre selbin vzfart .
0,1924 vn- dar an leite spehvi werc
0,1925 da bi Libanvs der berc
0,1926 an des fvoze entspringent
0,1927 zwen vrspringe . die bringent
0,1928 zesamene den Iordan
0,1929 der wazzir heizit einis dan
0,1930 das andir ist geheizin Ior
0,1931 der das wort noch sezzet vor
0,1932 vn- iesa dar nah setzet dan
0,1933 so sprichit es rehte Iordan .

0,1934 her an stozet ovh ein lant
 0,1935 das Palestina ist genant
 0,1936 Cananea . vn- Iudea
 0,1937 i- disin lantmarchin da
 0,1938 ist gelegin Ierusalem
 0,1939 die Sem der edil kvinic Salem
 0,1940 stifte . vn- Iebuseus .
 0,1941 Canaanens svn . nv giht alsvs
 0,1942 dvi scrift gewerliche
 0,1943 das Cananeischvi riche
 0,1944 i- dein lantmarchen sin gelegin .
 0,1945 Samarites der degin
 0,1946 Canaanens svn ovh nande
 0,1947 i- Palestina dem lande
 0,1948 eine veste i- sinim namin da
 0,1949 dvi was genant Samaria
 0,1950 Galilea ze einir sit
 0,1951 an disin selbin landin lit
 0,1952 dvi ih genennet han hie vor .
 0,1953 da lit der hohe berc Tabor
 0,1954 vn- Nazaret . von der got krist
 0,1955 menshlich bvrtig ist .
 0,1956 als vins dvi warheit tvot gewis
 0,1957 da lit ovh Petapolis
 0,1958 das von fvinf steten hohin rat
 0,1959 vn- wrde mit vil namen hat .
 0,1960 Gomerre . vn- Sodoma
 0,1961 sit wrdin ovh gebvwin da
 0,1962 die got in z abgrvinde
 0,1963 virsanchte dvrh ir svinde
 0,1964 da nv lit das rvte mer
 0,1965 da sitzit bi ein grozes her .
 0,1966 di Ismaheliten
 0,1967 die an dein ivngesten ziten
 0,1968 der welte fvegint groze not
 0,1969 das ist ein diet . die Nabaioth
 0,1970 sit . Ismahelis svn gebar
 0,1971 des sint zwelf geslehte schar
 0,1972 die mit kreften sit fvur war
 0,1973 gewahsen sint vil manig iar
 0,1974 der wc do bi dein zitin niht
 0,1975 do sih fvogte dvi geschiht
 0,1976 das sih zirteilten dvi kint .
 0,1977 dvi von Noe geboren sint .
 0,1978 Die diet . die Isiln . vn- dvi lant
 0,1979 der hovbitlant hie sint gena-
 0,1980 ane vahent . da der svnne vf gat
 0,1981 ir lantmarche zil gestat

0,1982 an der mitiln erde mers zil
 0,1983 mit maneger diet . mit landin vil
 0,1984 die doch sint hie gennet niht
 0,1985 an disvi lant man stozen siht
 0,1986 ostirhalp Egiptelant
 0,1987 das was do Mesraim genant
 0,1988 nah Camis svne Mesraim .
 0,1989 der stift es . vn- nand es nah im .
 0,1990 sit hiez ez Canopea
 0,1991 nah ir abgote den si da
 0,1992 an bettin . der hiez Canopus .
 0,1993 dar nah kam Egiptvs
 0,1994 dar . mit gewalte i- das lant .
 0,1995 nah des namen wart ez genant
 0,1996 als ez noh den namin hat
 0,1997 ostirhalp ein marche an gat
 0,1998 an dem roten mer . vn- streckit sih
 0,1999 westirt einin verren strich
 0,2000 tvot ez sin vndirscheit irchant
 0,2001 vnz an libian das lant
 0,2002 als vins dvi warheit beschiet
 0,2003 vier vn- zwenzig lvite diet
 0,2004 hat Egipte das lant
 0,2005 ez ist veste vn- gvot irchant
 0,2006 vn- mit vil grozir kraft behvot
 0,2007 von hvndirt tvsint vesten gvot
 0,2008 die in dem lande sint gelegin
 0,2009 dar kvmt enweder sne noh regin
 0,2010 noh schate fvir der svnnin schin
 0,2011 ez fvihtet mit dem vloze sin
 0,2012 Nilvs der da dvrh flvizit
 0,2013 er wahset . vn- irgvizit
 0,2014 so sere . das er dan . vn- dar
 0,2015 das lant vbirvlvizit gar .
 0,2016 vn- machet ez mit sinir kraft
 0,2017 fvihte . veizt . vn- berhaft
 0,2018 das vf der erde im ebinrich
 0,2019 dekein lant ist noh gelich
 0,2020 an landis gvete mit genvht
 0,2021 an genvhteclichir vrvht
 0,2022 ist bezzir lant niht anderswa
 0,2023 dr inne lit Tebaida
 0,2024 vn- alexandrie
 0,2025 dei vor zagheit der vrie
 0,2026 alexander stifte sit
 0,2027 vbir manegir hvndirt iare zit
 0,2028 Einsit ist an das lant gesat .
 0,2029 Babilonie ein hovbitstast .

0,2030 witer kvinicriche
 0,2031 disin landin algeliche
 0,2032 ist andirhalp ein vnd'scheit
 0,2033 mit vndirmarche an geleit
 0,2034 vn- Caucasas von Calpia
 0,2035 das ostirt ist gelegin da
 0,2036 biz vil bi ander marche zil
 0,2037 da lit entzwschent lande vil .
 0,2038 amazones dvi frechin wip
 0,2039 die mit kraft werlichin lip
 0,2040 hant . die sitzent dr inne
 0,2041 mit frevillichim sinne
 0,2042 stet ir gemvete vf mannes wer
 0,2043 der lant . gebirge . vn- mer .
 0,2044 beslvizet allenthalben
 0,2045 mit hohen vesten albin
 0,2046 beslozin sint die stolzen
 0,2047 Sarmartin . vn- Coltzen
 0,2048 Massageten vn- Seres
 0,2049 vo- dein ich bin bewiset des
 0,2050 das si ze m erst mit wisheit
 0,2051 begvndin machin sidin kleit
 0,2052 vn- swas von Sidin ist irchant
 0,2053 der lant stozet an disvi lant .
 0,2054 dar an stozit Bactria
 0,2055 das lant . vn- Ircania
 0,2056 dar inne vogil vliegent
 0,2057 ob vins dvi bvoch niht liegint
 0,2058 der gevidir git so lihten schin
 0,2059 das si die naht mvgin sin
 0,2060 v'borgen . swenn es vinster ist .
 0,2061 man sehe si schinen alle frist
 0,2062 reht als ein lieht das vaste
 0,2063 git lieht mit brennendem glaste .
 0,2064 Bi disin landin ze einir zit
 0,2065 ligint zwei lant groz vn- wit
 0,2066 der einis ist Cicia genant .
 0,2067 das andir hvma . dvi zwei lant .
 0,2068 vier vn- zweinzic diete hant
 0,2069 die i- dein landin sih begant .
 0,2070 da sint gelegin nahe bi
 0,2071 Montes Iperborei
 0,2072 da stozet allirnehist an .
 0,2073 albania . di wip . vn- man .
 0,2074 sint in wizir varwe gar
 0,2075 schoene . blanc . vn- wiz geuar .
 0,2076 das vnz an armenie gat .
 0,2077 dar inne die berge ararach .

0,2078 ligent . dar vffe sih nider lie
0,2079 als ich e han gesprochen hie
0,2080 dvi arche von der ich e las
0,2081 dar inne Noe genas
0,2082 mit allir lebindir geschafft
0,2083 als ez gebot dvi gotis kraft .
0,2084 Dar an lit Yberia
0,2085 das lant . vn- Capadoria .
0,2086 dar inne werdent swinde
0,2087 traginde von dem winde
0,2088 dvi berndvi ros . alse das geschicht
0,2089 das man dc fvil geworfen siht
0,2090 ez lept niht fvirbas wa-d drvi iar
0,2091 vn- danne stirbet ez fvir war .
0,2092 Da stozit an ein michil lant
0,2093 das ovch ist hovbitlant gena-t
0,2094 vil lande . dvi dar inne sint
0,2095 maneger hande lvite kint
0,2096 hat das selbe lant mit wer
0,2097 ez ist gelegin i- dem mer .
0,2098 das vil nah al dr vmbe gat
0,2099 vn- ez mit wer beslozen hat
0,2100 das ist dvi mindir asya
0,2101 i- disim hovbitlande da .
0,2102 Efphevs dvi stat nv ist
0,2103 dar inne der groze Ewangelist
0,2104 sante Iohannes lange sidir
0,2105 sih lie mit sinir rvowe nider
0,2106 vins allen selichliche .
0,2107 das erste kvinichriche
0,2108 das in der mindir asya
0,2109 lit . das ist Bittina .
0,2110 Berica das andir hiez .
0,2111 Migdonia an daz selbe stiez
0,2112 Nicea . vn- Nicke
0,2113 von dien wir lesin dicke
0,2114 an andern bvochen andirswa
0,2115 ligent i- Bittina
0,2116 dar an geleginliche
0,2117 lit Frigia das riche
0,2118 das ist al herlich besat
0,2119 mit smirna der hovbitstat
0,2120 Dirre stete hovbitlant
0,2121 ist dvi mere Frigia genant
0,2122 och lit Galatia da bi
0,2123 was der bilande mere si
0,2124 dvi mindir Frigia da lit
0,2125 vn- Darcania . da sit

0,2126 Troie dvi riche in wart geleit
0,2127 mit krefteclichir werdeheit .
0,2128 Ziconia . vn- Caria
0,2129 da bi ligent . vn- Lidia
0,2130 dvi lant . dvi kvinicriche groz
0,2131 dar an Tyatria sih sloz
0,2132 dvi stat . dvi sih noh slvizit z in
0,2133 zvo disin kvinicrichin drin
0,2134 heftint sich mit gelegenheit
0,2135 Isauria so man noch seit
0,2136 als ez dvi scrift bescheiden kan
0,2137 Cilicia das stozet dr an
0,2138 ein lant das ist genant alsvs
0,2139 amana . vn- Taurus
0,2140 zwei gebirge hoh irchant
0,2141 dvi scheident disvi selbin lant
0,2142 vn- ir vndirmarche alda .
0,2143 dar an stozit Licia
0,2144 Persida . vn- Pamphylia
0,2145 Pontus ist ovh gelegin da
0,2146 ein lant . das manigir lvite her
0,2147 hat vil . des landis nehste mer
0,2148 noch heizit mare poticum
0,2149 hie ist der lantmarche drvm
0,2150 dvi von der erde gelegenheit
0,2151 gein dem driten teile seit
0,2152 der teil . der lande hovbitlant
0,2153 ist dvi groze asia genant
0,2154 dar inne albesvndir
0,2155 sint dvi vil grozen wundir
0,2156 vn- dvi lant als ich mich virstan
0,2157 von dein ih hie gesprochin han .
0,2158 In dem driten teile d' erde hie .
0,2159 sih do mit buwe nidir lie
0,2160 Sem vn- der geslehte kint
0,2161 als ivh ir namin genennet sint
0,2162 wand in der teil ze teils wart
0,2163 an dirre selben vzvart
0,2164 da si sih teilten i- dvi lant
0,2165 swie dirre teil in were benant
0,2166 der sere ist vf gewahsen sidir
0,2167 Camis kinde lie sih nider
0,2168 vil in Semus teil zvoz im .
0,2169 als in Egipte Mesraim .
0,2170 Canaanes kint in al dvi lant
0,2171 dvi si mit gewaltis hant
0,2172 bezazin do dvi selbin zil
0,2173 wan ir geslehtes was so vil

0,2174 das ir dritteil . in z enge schein
 0,2175 gein dein andirn brvoderen zwein .
 0,2176 dvrh solhin crieg zoh sih Salem
 0,2177 Semis svn ze . Ierusalem
 0,2178 da Iebuseus als ich ez las
 0,2179 Canaanes svn ovh inne was .
 0,2180 nach dein si beiden wart genant
 0,2181 den ander dritteil . vn- des lant
 0,2182 der teil si besitzin solten
 0,2183 vn- ze teile besitzen wolten
 0,2184 Iapfetis kint do bi dein tagin
 0,2185 wil ich nennen vn- sagin
 0,2186 ir namin . vn- ir lande vnderscheit
 0,2187 nah ir rehter gelegenheit
 0,2188 Des andirn teiles anevanc .
 0,2189 zil . vndermarche . vn- vmbevanc .
 0,2190 lant . vn- lvite . vn- der stift
 0,2191 nennet vins alsvs dvi scrift .
 0,2192 Evropa heizit der teil
 0,2193 des slihtic vndirmarche seil
 0,2194 sih von nordin rihtet
 0,2195 sin vnderscheit sich slihtet
 0,2196 da Iene lantmarke ende hat
 0,2197 da dirre dritte teil ane gat
 0,2198 da sint gelegen nahe bi
 0,2199 die berge montes Riphei
 0,2200 vn- Danaïs ein wazzer groz
 0,2201 des flvz die lantmarke vndervloz
 0,2202 als ez noch bi dirre zit
 0,2203 ein wueste groz . mosig vn- wit .
 0,2204 Meotides Paludes
 0,2205 als vins dvi warheit wisit des
 0,2206 ist ovh der marche alda ein zil
 0,2207 dar an stozet lande vil
 0,2208 i- dem teile fvir . vn- widir
 0,2209 da lit Cicia dvi nider
 0,2210 das hovbitlant . vil lange ez hiez .
 0,2211 d' marke vn- vmbechreiz dr an stiez
 0,2212 des landes name vn- rehter strich
 0,2213 hebet nordint an . vn- endet sich /
 0,2214 an der Tvonovwe
 0,2215 i- der lantmarke schovwe
 0,2216 gelegen ist alania
 0,2217 Gottia . vn- Dania .
 0,2218 vn- lande vil dvi nah der zit
 0,2219 nah in genennet wurden sit .
 0,2220 Von der Tvonovwe als si gat
 0,2221 vn- ir flvz da den namen hat

0,2222 vntz an die hohsten albe hin
 0,2223 ist als ich bewiset bin
 0,2224 dvi obir Germanie gelegin
 0,2225 dvi dein namen hat gewegen
 0,2226 nah alliu Tvitschen landen
 0,2227 von dein . die ez svs nanden
 0,2228 nah dein sint ellvi Tvitschvi lan
 0,2229 noch Germania genant
 0,2230 welhe der vndermarche sin
 0,2231 westert scheidet si der Rin
 0,2232 nordent dvi elbe als si noch gat
 0,2233 dvi die marche vndirscheidin hat .
 0,2234 vn- ir gezilte marche git
 0,2235 i- disim teile swabin lit .
 0,2236 das alemannia hiez e
 0,2237 nah alemanne den bodense .
 0,2238 der in der swabe lande swebt
 0,2239 dvrh den mit richin flvze strebt
 0,2240 der Rin . des flvz noch strichit hin
 0,2241 von disin lantgebirgin dr in .
 0,2242 der von dem svndir teile gat
 0,2243 nordent ze tal . vn- den vlvz hat
 0,2244 vntz in daz groze nortmer
 0,2245 bi dem Rine lit mit wer
 0,2246 manic veste wol bereit
 0,2247 nach rilichir werdecheit
 0,2248 vil werlich . vn- rich irchant
 0,2249 dvi erste ist Chostentze genant .
 0,2250 di der edil degin gvot
 0,2251 vnvirzagt . vn- hochgemvot
 0,2252 ein Roemscher kvinic riche
 0,2253 stifte werdecliche
 0,2254 er hiez keisir Chonstantivs
 0,2255 nah im so nand er si alsvs
 0,2256 vn- tet ir namen so irkant
 0,2257 das si ist Chostenze genant .
 0,2258 Dar nah bi des Rines vlvot
 0,2259 so lit ein veste vnmazen gvot
 0,2260 Basel dvi vil werde
 0,2261 das niendir vf der erde
 0,2262 bedarf bezzer veste sin
 0,2263 si hat Chorn . vn- gvotin win .
 0,2264 vollecliche groze gnvht .
 0,2265 och hat si den besten lvft
 0,2266 der in cheinem lande mochte wesin
 0,2267 das sprich ich wan ich han s gelesin
 0,2268 dar zvo ist si gevestit
 0,2269 gewehit . vn- gegestet .

0,2270 mit maneger bvrc vil schone
0,2271 die si reht als ein krone
0,2272 zierent mit werlichir chraft
0,2273 i- Basel sint ovh ellenthaft
0,2274 mit hvse inne gesezzin
0,2275 z allir zit virmezzen
0,2276 fvinfzec rittir odir mer
0,2277 die man niemer widirker
0,2278 sihet tvon ze kindin
0,2279 ze vrovwin noh gesindin
0,2280 e das si gesigit hant
0,2281 ovh tvon ih ivh noh mer irkant
0,2282 da ist gvot alliz guotis
0,2283 da ist des heiligin Blvotis
0,2284 des von gotis herzen vloz
0,2285 das er dvrh vinsich alle goz
0,2286 an dem vroneChruize her
0,2287 dar an er heinc virwindet ser
0,2288 da ze Calvaria
0,2289 des selbin Chrvizis ist ovh da
0,2290 ze Basil i- der hovbitstat
0,2291 da vo- si gso vil lobis hat
0,2292 das si nieman volloben kan
0,2293 werlichvi lant dvi stozent dr an
0,2294 dvi mit richir genvht
0,2295 bringint manege sveze frvht
0,2296 So lit als ich bewisit bin
0,2297 nar nah bi dem Rine hin
0,2298 Ein schoene wuinnenchlichvi stat
0,2299 Strabvrc si den namin hat
0,2300 si ist gezieret schone
0,2301 si ist des landis krone .
0,2302 bi der stat vil nahe bi
0,2303 vbir cleinir rastin dri
0,2304 ligent silbirberge rich
0,2305 groze . hohe wuinnendlich .
0,2306 das silbir das da wirt gegrabin
0,2307 so s wirt gebrant . so wirt z irhabin
0,2308 vn- wirt gefueret i- die stat
0,2309 ze Strazbvrc . da von si vil sat
0,2310 ist von silbir . vn- her
0,2311 da von nah der bvoche ler
0,2312 Strazbvrc . in lingua latina
0,2313 heizit argentina .
0,2314 in tvisch ein Silberstat genant
0,2315 dvrh das wand ellvi Tvitschvi lant
0,2316 beidvi hie . vn- da . vn- dort .
0,2317 den vil keiserlichin hort

0,2318 antwuirten dar . vn- si fvirbaz
 0,2319 ze Rome da der keiser saz .
 0,2320 vins kvindit ovh dvi rehte zal
 0,2321 das bi dem Rine hin ze tal
 0,2322 lit Spire wol gevestent
 0,2323 da manege kvinege restent
 0,2324 vn- da wartende sint
 0,2325 wenne kom der megde kint
 0,2326 gebietende den strengin sent
 0,2327 dem si danne rede irgent
 0,2328 vn- vil gar ze rehte stant
 0,2329 wie si sin lvit gerihet hant .
 0,2330 Ovch svnd ir fvir war wizin das
 0,2331 das zwiscent Strazbvrc . als ich las
 0,2332 vn- Spire . lit ein drilih Berc
 0,2333 als vins seit der warheit werc
 0,2334 da von er drivels ist genant
 0,2335 i- allen landin wol irchant
 0,2336 wand da sint vfe schone
 0,2337 des richis Sper . vn- Chronen
 0,2338 die da mit hohir wurde sint .
 0,2339 ez ist dvi Chronen die das kint .
 0,2340 der Megede svn got Ihesus krist
 0,2341 der allir dingin schepfer ist
 0,2342 der ellvi dinc in sin gewalt
 0,2343 beslvizet . klein . groz . ivnc . vn- alt .
 0,2344 himil . erde . wazzir . steine .
 0,2345 vn- der helle krvft gemeine .
 0,2346 berihtet er mit sinir kraft
 0,2347 sin gewalt hat ellvi dinc behaft
 0,2348 der dise selbe krone trvog
 0,2349 der warheit weiz man vil vn- gnvog .
 0,2350 Nah Spire . bi dem Rine sa
 0,2351 lit ein stat Wormacia
 0,2352 dvi selbvi dvi ist vil gvot
 0,2353 Dar nah bi des Rinis flvot
 0,2354 lit Megenze vil vermezzin
 0,2355 ein Erzzebischof ist da gesezzin .
 0,2356 vins seit dvi Ystoria
 0,2357 das nah dem Moin Mogvncia
 0,2358 si disvi selbvi stat genant
 0,2359 si ist vil verre wol irchant .
 0,2360 Dar nah bi des Rinis floz
 0,2361 lit Choelne ein stat dvi ist vil groz
 0,2362 vn- in hohir schovwe gar .
 0,2363 dvi mere sagint vins fvir war .
 0,2364 dvi stat si seldin riche
 0,2365 wand da stetecliche

0,2366 restent grozir heiligen vil
 0,2367 der ih ein teil hie nennin wil
 0,2368 Caspar . Baltasar . vn- Melchior .
 0,2369 die drie kvinege . die hie vor
 0,2370 ir opfir gote brahten
 0,2371 vn- vil balde gahten
 0,2372 gein Bedlehem hin da er was
 0,2373 da sin sin mvotir magit genas .
 0,2374 magt da vor . vn- magt dar nah
 0,2375 ze Ihesv Christv was in gah
 0,2376 mit hohir kvinegis zvihte gar
 0,2377 bot im der eine wirovch dar .
 0,2378 der ander kvinig riche
 0,2379 vil gar zvihtecliche
 0,2380 bot er Mirren z opfer gar .
 0,2381 do gie der drite kvinig dar
 0,2382 vil zvihtecliche er sih lie
 0,2383 vf der erde an sinvi knie
 0,2384 vn- brahte kviniclichin solt
 0,2385 gote z opfir edil Golt .
 0,2386 die drie kvine die nv hat
 0,2387 dvi scrift genant . sint z d' stat
 0,2388 ze Cholne . da von man si wol
 0,2389 von rehten schvldin lobin sol .
 0,2390 Swem niht behagt der Paragraf
 0,2391 vn- von dem Rine dirre klaf .
 0,2392 der sol das ze lone han
 0,2393 er sol ez vngelesin lan .
 0,2394 vn- leb er allir sorgin bar .
 0,2395 Nv seit dvi scrift vins ovh fvir war .
 0,2396 In swabin landin springit
 0,2397 dvi Tvonov . vn- bringit
 0,2398 i- mare Ponticum mit kraft .
 0,2399 sechzig wazer manhaft
 0,2400 das ostirmer dar in si gat
 0,2401 ir flvz . ir rvns . geteilt sih hat
 0,2402 i- sabin groze strangen
 0,2403 e das ir flvz gegangen
 0,2404 kom in das mer . da si sih in
 0,2405 mit ir flvze rihtet hin .
 0,2406 als vins dvi warheit tvot irchant
 0,2407 an swabin stozit Baierlant .
 0,2408 ze tal al svndir wanchin
 0,2409 vn- dar nah ostirvranchin
 0,2410 da entzwschent vn- dem Rine lit
 0,2411 Rinvranchin ze der westirn sit
 0,2412 Tvischir lande get ein ger
 0,2413 vbir Rin . des teiles ker

0,2414 get ein sit an welschvi lant
 0,2415 als hollant . vn- Brabant
 0,2416 vn- Selant . da der selbe strich
 0,2417 vo- welschin landin scheidet sich
 0,2418 an ostirvranchin stozet da
 0,2419 Tviringen das lant . dar nah sa
 0,2420 ist dr an mit kraft gewahsen
 0,2421 das starche lant ze Sachsen
 0,2422 vn- des herschefte nah ir zal
 0,2423 bi der Elbe hin ze tal
 0,2424 vntz an das ende sint dvi lant
 0,2425 dvi nidir Germania genant
 0,2426 i- dirre lantmarche
 0,2427 ist gelegin Tennemarche
 0,2428 vn- landin . vn- Isiln vil dvi dar
 0,2429 eiginliche hoerent gar
 0,2430 als ich han vernomin e
 0,2431 nordent vbir den wildin se .
 0,2432 das groze lant ze Sweidin lit
 0,2433 vn- Norwege das alse wit
 0,2434 ist . als wir dicke han vernomin
 0,2435 das im kan nieman z ende komin
 0,2436 von grozir wilde . vn- das dvi naht
 0,2437 so vil des landis hat bedaht
 0,2438 mit vinstir trvebe . das kein man
 0,2439 dem lande z ende komin kan
 0,2440 als vor der vinstir in gezimt
 0,2441 dvi in des tagis lieht benimt .
 0,2442 vn- der lantmarcke schovwe
 0,2443 von d' grozin Tvonovwe
 0,2444 vntz an das hohe mitilmer
 0,2445 lit ane wid'rede wer
 0,2446 vil hohir lande hovbitlant
 0,2447 ein lant ist Messia genant
 0,2448 dar vil lande ist vndirtan
 0,2449 fvir war als ich gelesin han
 0,2450 dvi nidir Pannonia
 0,2451 nimt ir marche . ir namen da
 0,2452 das sint windischvi riche
 0,2453 dvi heizent werliche
 0,2454 Pannonia . vn- teilen sich
 0,2455 i- witir lande verren strich .
 0,2456 dar inne Pvlgarie
 0,2457 vn- das lant ze Rvmenie .
 0,2458 vn- dar an stozet dan ein lant
 0,2459 das ist Tracia genant
 0,2460 das bi den ziten Tyras
 0,2461 Iaphetis svn . als ich es las

0,2462 stifte an der ersten vzfart
0,2463 da erst dvi erde bvhaft wart
0,2464 als man ir lant noh nvizit .
0,2465 dvirh disvi riche flvizit
0,2466 der Neppir . der dvrh Rvizin gat
0,2467 dvi lantmarcke niht ende hat
0,2468 biz hin da Constabtinopel lit
0,2469 da dvi lantmarcke ende git
0,2470 vn- danne Chriechin hebit an
0,2471 do man Chriechin erst began
0,2472 stiftin . do nand es nah im
0,2473 Iapheti svn . mit namin Cetim
0,2474 den ich ovh han genennit e
0,2475 diz waz der zit . dar nah Noe
0,2476 ez stifte . des geslehte her
0,2477 von dein an z groze mitilmer
0,2478 sint al dvi riche . vn- dvi lant
0,2479 Chriechin mit einim namin gena-t .
0,2480 vil lande i- Chrichin ist gelegin
0,2481 dar inne man noh sihit pflegin
0,2482 mit gewalte schone
0,2483 vil kvinicklichir krone
0,2484 vn- dar vndir gegine vil .
0,2485 i- Chriechschir marche zil
0,2486 Dalmacia . vn- Epirvs lit
0,2487 zwei lant . i- landis groeze wit .
0,2488 an dvi stozit nahe alda
0,2489 Coonia . vn- Molosia .
0,2490 vn- Elladia das lant .
0,2491 ein lant ist attyca genant
0,2492 dar in mit richeit ist gesat
0,2493 atthene ein hovbitstat
0,2494 Peloponens . vn- aonie .
0,2495 Tesalia . vn- Macedonie
0,2496 Salnecge . vn- Emacia
0,2497 i- disin selbin landin da
0,2498 ist gelegin Olipapus
0,2499 ein berc der ist genant alsvs .
0,2500 des Ioch i- solhir hoehe stat
0,2501 das ez vnz i- die lvifte gat
0,2502 Da ligint geleginliche
0,2503 dvi groze kvinicriche
0,2504 Corintus vn- achaya
0,2505 Sicionia . vn- archadia
0,2506 dvi Chriechschvi lantmarche hat
0,2507 bevangin als ir name gat
0,2508 vn- hie vor vndirscheidin .
0,2509 ist mit dein marki- beidin .

0,2510 dem mer . vn- mit dein landen
 0,2511 dvi wir hie vor e nanden
 0,2512 als vins ir vndirscheit ir stift
 0,2513 genennet hat dvi rehtvi schrift
 0,2514 dvi noh fvirbas vins wisit hie
 0,2515 bescheidenliche rehte wie .
 0,2516 sin vndirscheidin . vn- genant
 0,2517 der bilande hovbitlant
 0,2518 dvi alhie genennit sint
 0,2519 an dirre lantmarche vndirbint
 0,2520 stozet mit namin da
 0,2521 dvi Obrvi Pannonia
 0,2522 dvi windescher sprache lant
 0,2523 tvot . vn- ir vnderscheit irchant
 0,2524 dvi nah irchantlichin sitin
 0,2525 disvi lant hat vndersnitin
 0,2526 vn- ir namin rehtvi zil
 0,2527 mit landen . mit herscheften vil
 0,2528 der name in dirre marche lit
 0,2529 disvi lantmarche wit
 0,2530 biz an das hohe gebirge gat
 0,2531 das Thvitschvi lant gescheidin hat
 0,2532 gein ostirt . vn- welschvi lant
 0,2533 vn- windesche marcke . tvot irkant .
 0,2534 Des selbin gebirgis strich
 0,2535 beginnit gein Marsilie sich
 0,2536 mit anevange hebin an
 0,2537 vn- streckit v're sich hin dan
 0,2538 nebint Tvitschin landin ze ein' sit
 0,2539 biz da dvi erde ein ende git
 0,2540 vn- das mer . mit im dvi lant
 0,2541 tvot nah ir vnderscheide irkant
 0,2542 die dr inne ligint . vn- da bi
 0,2543 Montes appenninii .
 0,2544 das gebirge ist svs genant
 0,2545 vn- scheidit windeschvi lant
 0,2546 von Tvitschin landin hin dan .
 0,2547 dvi an vngirn hebint an
 0,2548 i- der vndirmarcke wit
 0,2549 vil lande vn- kvinickriche lit .
 0,2550 vn- maneger hande lvite diet .
 0,2551 der svndersprache dr in geriet
 0,2552 vn- sich dr in hant gemezzin .
 0,2553 dien vngirn sint gesezzin
 0,2554 i-wendig ir klvse tor
 0,2555 vn- ir lantmarchin da vor
 0,2556 windescher lande vil
 0,2557 i-rehalp ir klvse zil

0,2558 kotziler . vn- koltzil sint
 0,2559 vn- manege vnkristenlichvi kint
 0,2560 i- vromdin svndersprachin .
 0,2561 valwen . vn- wilde Vlachin .
 0,2562 iensit des sneberges hant
 0,2563 sint lant . dvi si begant .
 0,2564 Inwendig vngern sint dvi lant
 0,2565 gelegin . dvi hie sint genant
 0,2566 inrehalp ir chlvse tor .
 0,2567 Westirhalbin lit da vor
 0,2568 Stire . vn- Ostirriche
 0,2569 stoziert geleginliche
 0,2570 an vngern . mit dein beidin
 0,2571 marckin . ist gescheidin
 0,2572 Tvitschvi lant . vo- Windeschin landin
 0,2573 die al die erde irchandin
 0,2574 die hant vins svs mit warheit
 0,2575 der lande gelegenheit geseit
 0,2576 svndir zwivillichin wan
 0,2577 Beheim . Merhern . Polan .
 0,2578 vn- das lant ze Rvizen
 0,2579 Liflant . vn- Prvizin .
 0,2580 i- windischer lande marche lit
 0,2581 gein svndirt lit ovh z einir sit
 0,2582 Kernden . dvi windensche Lant
 0,2583 i- Latine sint genant
 0,2584 dvi obrvi Pannonia
 0,2585 der vnderscheit der lande da
 0,2586 dvi scrift alsvs bescheidin hat
 0,2587 als alhie gescribin stat .
 0,2588 Vbir appennischvi riche lit
 0,2589 da windeschvi lantmarche ende git
 0,2590 Italia dvi mit dem mer
 0,2591 vn- mit den bergin ist ze wer
 0,2592 beslozen vestekliche
 0,2593 dar inne Roemesch riche
 0,2594 den vrhap sinis namin hat
 0,2595 vn- da der Stvol inne stat
 0,2596 da man der kristenheit sol gebin
 0,2597 lere . vn- kristenlichis lebin
 0,2598 die man nah gotis gebote wol
 0,2599 geistliche da vindin sol
 0,2600 da ligint inne richvi lant
 0,2601 der hovbetname ez ist genant
 0,2602 Sicilia . vn- dvi lant vil gar
 0,2603 dvi mit namen hoerent dar
 0,20382 nv svndeten abir sere an gote
 0,20383 Widir gotis e gebote

0,20384 dvi kint der Israhelschin diet
0,20385 dar vnbe got von in do schiet
0,20386 sin hvlde vn- sinir helfe kraft
0,20387 Philistim die heidinschaft
0,20388 liez er si twingin dc ist war
0,20389 eiginliche vierzig iar
0,20390 dc si in diendin an ir danc
0,20391 ir eiginschefte ioch si twanc .
0,20392 de s abir got an riefin
0,20393 mit hercen svften tieffin
0,20394 dc er ir not irchande
0,20395 vn- sine helfe in sande
0,20396 wan in die heidin tatin we
0,20397 do tet got alse da vor e
0,20398 vn- sante in sinir helfe trost
0,20399 wie si wurdin do irlost
0,20400 vn- von weme . dc wil ih sagin
0,20401 ez wc do bi dien selbin tagin .
0,20402 ein man gesezzen i- Pharan
0,20403 vz dem geslehte von Dan .
0,20404 wc er bvrtig . vn- geboren
0,20405 der hohsten einir vzirhorn
0,20406 dem man in dem geslehte vant
0,20407 der was Manve genant
0,20408 der nam von sinim kvinne ein wip
0,20409 dui wc so schone . dc ir lip .
0,20410 wc mit lobelichir kraft
0,20411 vil wit irchant . vmberhaft
0,20412 was si . an bernder genvht
0,20413 ich meine menslihir vrvht
0,20414 wart si nie mvoter e genant
0,20415 der wart einis tagis gesant
0,20416 von gote ein himilschir bote
0,20417 ein engil der kvnte ir von gote
0,20418 ein vroiderichis mere
0,20419 swie si vmberhaft were
0,20420 got woelte si der selden wern
0,20421 dc si solte ein svn gebern
0,20422 der gotis gewihtir hieze
0,20423 dc si den niht lieze
0,20424 trinchin bi dien ziten sin
0,20425 dekein trinchin . odir win .
0,20426 odir iht dc in so swahte
0,20427 dc ez in trvnchin machte
0,20428 vn- im niht schriete sinvi har
0,20429 wan er solte al fvir war
0,20430 gotis irwerltir sin genant
0,20431 vn- er solte mit sinir hant

0,20432 loesen Israhel mit kraft
0,20433 von Philistim der heidinschaft
0,20434 Dvi vrovwe kerte widir dan
0,20435 vn- seite disvi mere ir man
0,20436 was si hate dort geschin
0,20437 ovh begvnde si viriehin
0,20438 wie schone der bote were
0,20439 der ir so hohvi mere .
0,20440 mit svezem troste tet irchant
0,20441 Manve began zehant
0,20442 trvrin . dc der engil niht
0,20443 komen wc an sin gesiht
0,20444 des wart er ane maze vnvro
0,20445 mit trviwin riet dvi vrovwe do
0,20446 dc si got betin dc er in
0,20447 sante abir sinin engil hin
0,20448 der in mit lere tete kvnt
0,20449 die gotis botschaft anderstvnt
0,20450 als er ir da vor tet
0,20451 hier vmbe tatin s ir gebet
0,20452 mit innenchlichim mvote gar
0,20453 do sante in got den engil dar
0,20454 den er der vrovwen hate gesant
0,20455 der tet Manve bechant .
0,20456 die botschaft . als der vrovwen e
0,20457 do bat der gvote Manve
0,20458 den engil . dc er sezze
0,20459 zvoz in . vn- mit in ezze
0,20460 ein kitze was schie bereit
0,20461 vn- brot mit svezer reinikeit
0,20462 dc der engil soelte
0,20463 ezzen . ob er ezzen woelte .
0,20464 der engil sprah . “ih izzi s niht
0,20465 opfir s hie vor gotis gesiht
0,20466 vf disin stein” do dc geschah
0,20467 Manve z em engil sprah
0,20468 “herre wie ist der name din”
0,20469 “wc wilt v des namen mn
0,20470 der wundirlih ze nennin ist”
0,20471 do wart an der selbin vrist
0,20472 vf dc opfir dar gesant
0,20473 ein fvir . dc opfir wart virbrant
0,20474 vn- der engil schiet von in
0,20475 mit der fvireres flammen hin
0,20476 dc si s beidvi sahen an
0,20477 irschrochenliche sprah der man
0,20478 “nv sterbin wan dc mvoz geschihin
0,20479 sit dc wir got habin geschin

0,20480 des mvoz irsterbin vinsir lip"
 0,20481 "niht" sprach do dc wise wip
 0,20482 "got vinsir opfir hat genomen
 0,20483 dc sol vins ze heile komen
 0,20484 vn- hat kvinftige warheit
 0,20485 von vinsirm kinde vins geseit
 0,20486 des svln wir sin von gote vro"
 0,20487 dar an in rehten ziten do
 0,20488 wart Manve sin svn geborn
 0,20489 ein kint nah wunssche vzirhorn
 0,20490 dc wart Sampson genant
 0,20491 als in der engil tet irchant
 0,20492 der in von gote als ih e las
 0,20493 gesant in gotis botschaft was
 0,20494 Sampson in sinir kintheit
 0,20495 begynde als noch dvi warheit seit .
 0,20496 wahsen . vn- legin zvo
 0,20497 beidvi spate vn- vrvo
 0,20498 i- sinir ivngin kindis ivgint
 0,20499 er wuohs mit kraft an mannis tvgint
 0,20500 i- wunschlichir volleist
 0,20501 got sante zvoz im sinin geist
 0,20502 so vollechliche swer in sah
 0,20503 od' in virnam . das im der iah
 0,20504 swenn er gewuehse in sine tage
 0,20505 er wurde ein gotis wissage
 0,20506 vn- gotis kempfe an vreicher wer
 0,20507 von Dan . in des geslechtes her .
 0,20508 wart er ze dien hohsten schiere irhorn
 0,20509 do der degin wolgeborn
 0,20510 i- sinir kindis ivngint began
 0,20511 wahsen . vn- er wart ein man .
 0,20512 er fvor eins tagis gein Tampna
 0,20513 i- der heiden lande da
 0,20514 solte ein hohgezit geschihin
 0,20515 dar gaht er . er wolte si gesehin
 0,20516 dvrh sin fvirwitze er kam dar
 0,20517 als er dar kam . er wart gewar
 0,20518 einir megde schone . vn- minnenchlih
 0,20519 nah der begynd er senen sih
 0,20520 so sere dc er gedahte sidir
 0,20521 ze vater vn- ze mvoter widir
 0,20522 vn- sagt in als ih han viriehin
 0,20523 dc er hat in Tampna gesehin
 0,20524 ein wip die mvest er han . dc sie
 0,20525 im ze wibe gebin die
 0,20526 sin vater . vn- sin mvoter
 0,20527 die sprachen "ach svn vil gvoter .

0,20528 wer hat diu an den willin braht
0,20529 das tv ze nemenne hast gedaht
0,20530 dir ein wip von Philistim”
0,20531 si beidvi do begvndin in
0,20532 die vmbesniten heidin
0,20533 vn- ir tohtern leidin
0,20534 swenn er wip im wolte nemen
0,20535 so solte wibis im gezemin
0,20536 von sinis geslehtis frvht
0,20537 vn- von dien heidin han die flvht
0,20538 dc von der vrvht ir irrekeit
0,20539 sin geslehte iht wurde hin geleit
0,20540 gein des hohsten gotis gebote
0,20541 do wuisten si niht daz von gote
0,20542 diz was e geboten . vn- do
0,20543 dc ez solte sin also
0,20544 dc got gedahte wundirs mite
0,20545 dvrh des selbin wundirs sitte
0,20546 schvof den ivngin degin sa
0,20547 gotis ordin . vn- gie gein Tampna
0,20548 zvo dien heidin Philistim
0,20549 vf dirre vart fvor do mit im
0,20550 der vater . vn- dvi mvoter sin
0,20551 vn- taten im des volge schin
0,20552 dc si mit im woltin dar
0,20553 endin sinin willin gar .
0,20554 Do si mit im . vn- er mit in
0,20555 fvorin vf der vart da hin
0,20556 vn- si begvndin nahin
0,20557 dort her begvnde . gahin
0,20558 ein Lev gein in starch vn- fier
0,20559 so grimmecliche fvor dc tier
0,20560 gein in . dc si do svndir wan
0,20561 den lip virlorn wandin han
0,20562 von sinin sitin manigfalt
0,20563 Sampson der edil degin balt
0,20564 lief do mit blozen handin dar
0,20565 vn- vmbereit ze wer vil gar
0,20566 vn- brahc dem Levwen sa zestvnt
0,20567 von dem hovbit vf den mvnt
0,20568 dc er ane wer lag tot
0,20569 der minne liebe im do gebot
0,20570 dc er die selben vrovwen nam
0,20571 ze wibe . do er zvoz ir kam
0,20572 er mahelte si . vn- wart inein
0,20573 dc si kertin widir hein
0,20574 vn- dar nah widir kamen sit
0,20575 ze der brvitlovphthe hohgezit

0,20576 als von in da was vf geleit
0,20577 do si wurdin sit bereit
0,20578 vn- hin widir wolten
0,20579 z em brvotlovft als si solten
0,20580 Sampson hin mit dien sinin gie
0,20581 da er den Levwin e ligin lie
0,20582 dem hate in sinim mvnde
0,20583 genistet al die stvnde
0,20584 von jmbin ein michil swarn
0,20585 der dr in dvrch nisten was gevarn
0,20586 vn- hate in dem selbin zil
0,20587 gebrvetet dr inne honegis vil
0,20588 Sampson der edil wigant
0,20589 nam do des honegis mit sinir hant
0,20590 vn- bot ez hie . vn- da
0,20591 dem vater . vn- der mvoter sa
0,20592 die azin s . vn- waren vro
0,20593 der stercke sin . si kerten do .
0,20594 hin da der brvtlovpht was geleit
0,20595 den si mit grozir richeit
0,20596 begiengin do die sibir tagei
0,20597 do si nah rehter warheit sage
0,20598 virnamen . vn- wart gesaget
0,20599 wie vrech er were . vn- vnvirzagit
0,20600 wie starch . mit manlichir kraft
0,20601 si gabin in sine geselleschaft
0,20602 im drizig knappin ebinalt
0,20603 vn- im ebinalt gestalt
0,20604 dc si die zit mit im virtribin
0,20605 vn- sine gesellen belibin
0,20606 wan mit gelich behendvi spil
0,20607 machint kvrzewile vil
0,20608 als ez irgie Sampson
0,20609 ir kvrzewile ze lone
0,20610 leit er mit wislichir kvir
0,20611 in einir retteschen fvir .
0,20612 er sprach z in “irratent ir
0,20613 dise retteschen von mir
0,20614 i- sibir tagen . ir hapt zehant
0,20615 gewonnen drizig gewant
0,20616 tvont ir des niht . z em selbin zil
0,20617 svlt ir mir gebin alse vil .
0,20618 nv ratent ez ih sage ivh wie
0,20619 vz dem ezenden gie
0,20620 dc ezzen . dc der starche man
0,20621 dc sveze von dem starchen kan
0,20622 irratent ir diz . al fvir war
0,20623 hapt ir gewunnin drizig par

0,20624 kleidir . mit gewinne an mir .
0,20625 diz lob ich ivh . so tvont ovh mir”
0,20626 diz wart gelopt ze beidir sit
0,20627 vbir drier tage zit .
0,20628 mohten s als dvi warheit giht
0,20629 die retschin noh irraten niht .
0,20630 dc was in leit . vn- vngemah
0,20631 zehant man si do keren sah .
0,20632 ze Samsonis wibe hin
0,20633 vn- baten si des . dc si in
0,20634 irfvere der retschin vndirscheit
0,20635 vil richvi kleinoede gemeit
0,20636 gehiezin s ir . bi grozer dro
0,20637 dc si in irfvere do
0,20638 der reteschen tvitvnge
0,20639 Sampson der vrece ivnge
0,20640 kam do ze sinim wibe
0,20641 do bot si s sinim libe
0,20642 mit zarte grozir liebe vil
0,20643 biz das si s brahte vf das zil
0,20644 mit manegir trvge . vnz an die stvnt
0,20645 dc er ir tet die warheit kvnt .
0,20646 Dar nah do der sibinde tag
0,20647 gein dem zile do gelag
0,20648 dc si die retschen wolten
0,20649 entsliezen als si solten
0,20650 si kamen z im . als er si sah
0,20651 ir mvnt sinir vrage sprah
0,20652 “sag an Sampson . was sterchir si
0,20653 dan der Lev . vn- sage da bi
0,20654 wc honegis sveze si gelih .”
0,20655 do sprah der degin ellens rich
0,20656 “was hat vnkvistigir- lip
0,20657 dan das vnkvtige wip
0,20658 dvi retsche wer novh vnervarn
0,20659 hetint ir nah ir niht gearn
0,20660 mit minir kalbin dvi den fvnt
0,20661 iv rehte hat gemachit kvnt .
0,20662 als ih die warheit ir beschiet .”
0,20663 sin zornig herce im do geriet
0,20664 das er von dannen kerte sa
0,20665 gein ascalon . vn- slvog alda
0,20666 drizig heidin der gewant
0,20667 nam er vn- brahte si zehant
0,20668 hin widir da der degin balt
0,20669 sine werschaft mite galt
0,20670 dien . die im s gewonnen an
0,20671 in grozim zorne schied er dan

0,20672 vn- fvor abir widir hein
0,20673 sin mvot vil sere irzvirint schein
0,20674 vn- begynde im leidin
0,20675 dvi vrvintschaft mit dien heidin
0,20676 i- dien tagen do der degin
0,20677 wc da heime vndirwegin
0,20678 sin swehin gap sin wip zehant
0,20679 einim andern man . do er dc lant
0,20680 vn- das wip fromden began
0,20681 do wart der ellenthafte man
0,20682 virswigen vmbe die geschicht
0,20683 er wuiss es vil wenig icht
0,20684 wand er nie niht da von virnam
0,20685 e dc er hin widir kam .
0,20686 vn- nah gewonheit wolte
0,20687 ligen als er solte
0,20688 bi sinim wibe . do sprah
0,20689 ir vater z im . do das geschach
0,20690 “la diz abe . ez mag niht sin
0,20691 ih han gegeben die tohter min
0,20692 einim andern man . do das von dir
0,20693 wart geseit mit warheit mir
0,20694 dv woltist niemir widir komen .
0,20695 han ih dir dise nv genomen .
0,20696 so han ih eine noh da bi
0,20697 dvi ist vil schoner dan si si
0,20698 die gib ich dir fvir iene . das tv
0,20699 si lazest gvetliche nv
0,20700 wan ich binamen des hate wan
0,20701 das tv hetist si virlan
0,20702 min tohter iene . dvrh daz
0,20703 dv ir trvegist grozin haz .”
0,20704 Sampson der ellenthafte man
0,20705 so sere zvirnin do began
0,20706 dc er vil vnsite pflag
0,20707 er sprah “fvir hvite disin tag
0,20708 sol Philistim gescheidin sin
0,20709 gar von der frvintschefte min
0,20710 sit mir ist vibil hie geschehin
0,20711 so svln si sih von mir virsehin
0,20712 ivbils bi dien ziten min
0,20713 ih wil in vnschvldig sin
0,20714 wand ez an mir begynnen ist”
0,20715 diz was i- des zites vrist
0,20716 so man snidin sol das korn .
0,20717 Sampson der degin wolgeborn
0,20718 drvi hvndirt fvihse gevie
0,20719 vn- als er iegeslichin lie

0,20720 der ellenthafte wigant
0,20721 dem fvhse an den zagil bant
0,20722 eine vachil . dvi bran
0,20723 vn- lie si zirlovfen dan
0,20724 i- dvi korn . her . vn- hin
0,20725 als si zirlovfen kamen dr in
0,20726 so bran dc korn gar . wan ez was
0,20727 dvirre . herte . vn- niht gras .
0,20728 dewedir korn . bovm . noh Rebin
0,20729 swas erde wuochir solte gebin .
0,20730 wan dc alliz gar virbran
0,20731 do das korn brinnin began
0,20732 do mvest es alliz brinnin
0,20733 ze brinnende beginnen .
0,20734 Do die lantlvite alsolhis schadin
0,20735 von im wurdin vbirladin
0,20736 si begvndin grozen zwivil han
0,20737 wer ez moehte han getan
0,20738 vnz in dvi warheit wart gesagit
0,20739 dc der der vnvirzagit
0,20740 der ellenthafte Sampson
0,20741 in allin hate alsolhin lon
0,20742 getan . dvrh solhe smaheit
0,20743 dc sin wip im was virseit
0,20744 vn- alse smeliche genomen
0,20745 das moehte in wol ze schadin komen
0,20746 noh fvrbas dan ez were geschehin
0,20747 si begvndin alle iehin
0,20748 si soltin rechin diz mein
0,20749 zehant wurdin si des inein
0,20750 dc si dvrh des zornis pin
0,20751 virdarpten sa den swehir sin
0,20752 dvrh sin vnfvoqe das geschah
0,20753 zehant man in virderbin sach
0,20754 an gvote . vn- an libe
0,20755 an kindin . vn- an wibe .
0,20756 dvi mvesten rvmen dc lant
0,20757 vn- wart zerstoeret . vn- virbrant
0,20758 sin swehir dvrh den vnfvog
0,20759 den er gein in mit schvldin trvog
0,20760 Dvi mere embvten s im zehant
0,20761 do sprah der stoltze wigant
0,20762 “swie wol si habin irrochen mih
0,20763 so mvoz doch gein in min gerih .
0,20764 iemir mere stete sin
0,20765 ih ricke an in den andin min
0,20766 vn- dc mir da geschehin ist”
0,20767 i- disen ziten vn- in der vrist

0,20768 slvog er ir vil . me . vn- vil
 0,20769 er brahte si in chvrzim zil
 0,20770 i- solhe vorhte groz . dc sie
 0,20771 von im gervoweten nie
 0,20772 wan mit vorhtelichir not
 0,20773 als in dvi vorhte sin gebot
 0,20774 dar engegin si mvesten vorhte han
 0,20775 ein Lvoqe was genant etan
 0,20776 dar in zoh er sih do zehant
 0,20777 vn- wuoste dr vz . ir lvite . ir lant
 0,20778 mit sinir manlichir kraft
 0,20779 mvot er so vil die heidinschaft
 0,20780 dc si mit vorhte entwichin im
 0,20781 nv besamte sih Philistim
 0,20782 mit grozir kraft . vn- fvoeren sa
 0,20783 in das lant . terra jvda
 0,20784 vn- herbergeten nahe bi
 0,20785 einir veste dvi hiez Lesbi
 0,20786 da si ein krefterichis her
 0,20787 haten mit werlichir wer .
 0,20788 Die von jvda sprachen do
 0,20789 ze dien heidin Philistim also
 0,20790 “wes zihint ir vins . vn- was han wir
 0,20791 gein iv missetan . das ir .
 0,20792 alse vientliche sit
 0,20793 vf vins gevarn an dirre zit
 0,20794 nv sin wir ivwir knehte doh
 0,20795 vn- dienin ivh mit willin noh
 0,20796 vn- habin niht dar abe genomen”
 0,20797 die heidin sprachin “wir sin komen .
 0,20798 dc ir des balde gahit
 0,20799 vn- vins Sampsonin vahit
 0,20800 wan er ivh missetrviwit niht
 0,20801 nv vahit in . swie dc geschiht
 0,20802 dc ir ivh vndirwindit
 0,20803 sin . vn- ir n gebindit
 0,20804 vn- er vins danne gegeben wirt
 0,20805 vinsir zorn ivh gar virbirt
 0,20806 vn- tven ivh iemir deste bas
 0,20807 ob ir vins gefvegint . das
 0,20808 er vins gefangen wirt gegeben
 0,20809 geschiht des niht . ir mvozint lebin
 0,20810 iemir mer mit erbeit
 0,20811 dvi muoz ivh sin von vns bereit
 0,20812 dc svlt ir nemin in ivwirn mvot
 0,20813 wan swas er vins ze leide tvot
 0,20814 dc get vbir ivh . das t vinsir mvot
 0,20815 ob ir niht vinsirn willen tvot”

0,20816 Uon jvda kerten do von dan
 0,20817 ze Sampsons drvi tvsint man
 0,20818 vn- sprachin also z im
 0,20819 “vins wellent die heidin Philistim
 0,20820 zirstoeren gar . ob wir dich in
 0,20821 antwuirten niht gevangen hin
 0,20822 wir mvozin gar pfant sin . swas tv
 0,20823 in leidis tvost . vn- schadin nv
 0,20824 da von solt v vins lere gebin
 0,20825 wie wir in disin dingin lebin
 0,20826 so dc wir iht virderbin .”
 0,20827 “dc hilf ich gerne werben”
 0,20828 sprah Sampson . “vn- ivh niht
 0,20829 leidis iht . dvrh mih geschiht .
 0,20830 welt ir swern des . dc ir
 0,20831 niht schadent an den libe mir
 0,20832 also dc ir iht toedent mich
 0,20833 noh virderbent . so wil ih
 0,20834 antwuirten mih i- ivwir hant
 0,20835 vn- ir antwuirtent mih cehant
 0,20836 den heiden . an dien stvndin
 0,20837 an zwei starchvi seil gebvndin
 0,20838 dvi starch . vn- nviwe sin .
 0,20839 von starchen strangen henephein
 0,20840 vn- swas got welle dc geschehe
 0,20841 so man mih in gegeben sehe
 0,20842 dc ir von in ane leit
 0,20843 belibit . vn- an erebit .”
 0,20844 des ratis wart ir herze vro
 0,20845 Sampson antwuirte sih in do
 0,20846 gevangin . si fvorten in
 0,20847 gebvndin . zvo dien viendin hin
 0,20848 da si lugin . mit grozer kraft
 0,20849 do riefin si der heidinschaft
 0,20850 dc si vil balde kemin
 0,20851 vn- in gevangin nemin
 0,20852 des vroiten sih der heidin schar
 0,20853 si liefin algeliche dar
 0,20854 als si in woltin vahin
 0,20855 do si begvndin nahin
 0,20856 got tet im groze helfe irchant
 0,20857 ze stvckin brah er sinvi bant
 0,20858 reht . als ein bloedis dvrre stro
 0,20859 nv gestvont er also
 0,20860 dc er da gein der heidin her
 0,20861 trvog dekeinir slahte wer
 0,20862 dewedir iene . dise . noh die .
 0,20863 do vant er vf dem velde hie

0,20864 liginde eins esils kinnebein
0,20865 dc in gefvegir groeze schein
0,20866 vn- drang mit werlichir kraft
0,20867 da mite vf die vrenchen heidinschaft .
0,20868 vn- slvog in mit strite sa
0,20869 tvsint man ze tode da
0,20870 dc si da vor im lagin tot
0,20871 als dvi gotis kraft gebot
0,20872 die andirn do entrvnnin dan
0,20873 dem krefterichin starchen man .
0,20874 Do Sampson mit manheit
0,20875 alse hohen sig irstreit
0,20876 ein nviwis getihter er sang
0,20877 wan im so selichlich gelang
0,20878 da mit er gvfte sin getat
0,20879 dvrh gvftigis hercen rat
0,20880 tet er in sinim sange irchant
0,20881 den pris . den da irstreit sin hant
0,20882 mit der gotis helfe kraft
0,20883 dvi in do mahte sigehaft
0,20884 an dien virvvohten heidin
0,20885 do er svv was gescheidin
0,20886 von dem selbin strite dan
0,20887 von grozir mvede in began
0,20888 so ser dvirsten . von dvrstes not
0,20889 dc er nah was von dvreste tot
0,20890 vn- virdorbin gar . got rief er an
0,20891 “got herre” sprach der vrence man
0,20892 “ein dvirrir dvrst der brennet mih
0,20893 nv tvo mir helfe schin . das ih .
0,20894 niht ane wer virderbe
0,20895 vn- hie von dvreste sterbe
0,20896 vn- das ih niht werde gesant
0,20897 i- dirre vmbesniten hant
0,20898 also dc alhie min lebin
0,20899 in ir gewalt icht werde gebin .”
0,20900 Got dvrh Sampsonis gebet
0,20901 ein wundirlichis wundir tet
0,20902 da er im irzeigte mite .
0,20903 sine wundirliche site
0,20904 wan got der gewere
0,20905 ist gar ein wundirere
0,20906 als er alda lie werdin schin
0,20907 an Sampson dem kempfen sin
0,20908 ein brvne vz dem grozesten zan
0,20909 von des esils kinne ran .
0,20910 der in dem dvrrren beine entsprang
0,20911 Sampson alda des brvnnin trang

0,20912 biz dc der ellenthafte man
0,20913 al sine krefte widir gwan
0,20914 vn- er vil wol gelabit wart
0,20915 do im da vf der selbin vart
0,20916 gelang so selicliche
0,20917 der edele mvotis riche
0,20918 schiet von dan . er kerte sa
0,20919 i- eine stat . dvi hiez Gaza
0,20920 dvi von dannin was gelegin
0,20921 da gesah der starche degin
0,20922 ein hovescherin ein schoene wip
0,20923 dvi hate ein minninchlichin lip
0,20924 zvo der gie er . vn- lag bi ir
0,20925 dvrh sinis mvotwillen gir
0,20926 als in sin irrecheit lerte
0,20927 nv . do er zvoz ir kerte
0,20928 vn- das dien heidin wart irchant
0,20929 si virsazten im zehant
0,20930 dvi bvirge tor mit starchir wer
0,20931 der pflag heidin ein michil her
0,20932 die in solten slahin gar
0,20933 swenn er zvoz in keme dar
0,20934 vn- er vz hin wolte gan
0,20935 so solt er dc lebin lan
0,20936 Do wart mit wisin sinnin
0,20937 Sampson der degin innin .
0,20938 dc im dvi lage wc geleit
0,20939 mit vrechir mannis manheit
0,20940 brah er die lage . als dc geschah
0,20941 dvi tor er vz ir slozen brah
0,20942 vn- trvog dc erinne werc
0,20943 zwei tor hin vf den hohsten berc
0,20944 ze ietweder hant . ietweder tor
0,20945 trvog er so lihteclich embor
0,20946 als ez werin zwei lihtvi bret
0,20947 dar nah do er dc getet
0,20948 ze Montes Oret er do kam
0,20949 ein wip er da ze wibe nam
0,20950 dvi was geheizen Dalida
0,20951 bi der liez er sih nidir da
0,20952 wan er von herzen minte si .
0,20953 do er alsvs ir wonte bi
0,20954 nah vraginde im kamen dar
0,20955 von dien heidin fvinf schar
0,20956 vn- bvten ir mit gedinge
0,20957 einlvif hvndirt pfenninge
0,20958 ze miete vn- ze lone
0,20959 dc si von Sampsonsone

0,20960 irfvere dvi rehtvi mere
 0,20961 wa von sin sterche were .
 0,20962 vn- mit welhin dingen
 0,20963 si in mohte- betwingen
 0,20964 vn- gefangen fveren hin
 0,20965 von gvote grozen gewin
 0,20966 gehiezen s ir noh fvrbaz
 0,20967 dc si mit listen fvogte . daz
 0,20968 si moekten in gevahin
 0,20969 des solte si lon empfahin
 0,20970 Dalila begynde ir man
 0,20971 vlizecliche ligen an
 0,20972 z allen ziten vraginde .
 0,20973 listende vn- bagende
 0,20974 gelihsende z allir stvnt
 0,20975 dc er ir rehte tete kvnt
 0,20976 wa von er hete solih kraft
 0,20977 vn- welhe kraft im were an behaft
 0,20978 dvrh sinin spot seit er ir do
 0,20979 dvi mere von sinir kraft also
 0,20980 er sprah “wer ich gebvndin
 0,20981 vn- gebvndin fvndin
 0,20982 mit sibir seilen ederin
 0,20983 dvi vrech vn- nwiwe solten sin
 0,20984 so wer ich so betwungen gar
 0,20985 dc ih an kreften wurde bar
 0,20986 vn- wurde werlos als ein man
 0,20987 der mine sterche nie gewan
 0,20988 dvrh das wil ich z virsvochen lan .”
 0,20989 do disvi rede was getan
 0,20990 Dvi fvirwitze Dalida
 0,20991 hiez sibir seil gewinnen sa
 0,20992 von adirn starch . vrisch . vn- gvot .
 0,20993 da mite der degin vrechgemvot
 0,20994 gebvndin wart alda er lag
 0,20995 vn- einis slafes empflag
 0,20996 wan er hate sich geleit
 0,20997 mvede ein teil von irreckeit
 0,20998 die heidin philistei
 0,20999 haten sih geleit da bi
 0,21000 wartende sin . do rief iesa
 0,21001 mit valschen trviwen Dalila
 0,21002 “wol vf Sampson hvete din
 0,21003 dir went die heidin schade sin
 0,21004 die sint vf dih komen her”
 0,21005 vf sprang er sa . zehant als er
 0,21006 ir rvof irhorte . dc geschah
 0,21007 dvi sibir seil er gar zerbrah .

0,21008 als ob si werin dvirris stro
 0,21009 die heidin im entrvnnen do
 0,21010 von grozen vorhten . abir sa
 0,21011 firsvochtin fvirbas Dalila
 0,21012 also dc si den wigant
 0,21013 abir an sibir seil gebant
 0,21014 dvi er zirbrah als da vor e
 0,21015 noh betrov g si in fvirbas me
 0,21016 mit sinim willin al fvir war
 0,21017 si bant im slafende dc har
 0,21018 an eine svl . als er entslief
 0,21019 alzehant si ime rief
 0,21020 als e . der heidene vorhte in twang
 0,21021 dc er vz dem slaffe sprang
 0,21022 vn- zvhte vz der erde dan
 0,21023 den pfal . da er gebvnden an .
 0,21024 was . dvrh virsvochennes kvindekeit
 0,21025 als ih ivh nv han vor geseit .
 0,21026 Do sih Dalila began
 0,21027 virsinnin das si trovg ir man .
 0,21028 mit valscheit i- vngvete
 0,21029 virkerte si ir gemvete
 0,21030 vn- begie der valscheit zeichin
 0,21031 nv began si smeichin .
 0,21032 nv zarten . nv weinen
 0,21033 nv trvrekeit irscheinen
 0,21034 nv mit gvetlichin siten
 0,21035 gvetliche drovn . gvetliche biten
 0,21036 nv vrvintschaft im virziehin
 0,21037 nv svone widir liehin
 0,21038 nv trviten . nv minnen
 0,21039 mit valschen trvgesinnen
 0,21040 brah z ir valschir lip dar an
 0,21041 dc ir der krefteriche man
 0,21042 mit kraft niht mohte widirstan .
 0,21043 er mveste si gar wizzen lan
 0,21044 swes si in vragte . dc geschah
 0,21045 Sampson ze sinim wibe sprah
 0,21046 “nv wil ih dir die warheit sagin
 0,21047 sit minir gebvrt in minin tagin
 0,21048 ist mit gotis heilicheit
 0,21049 dvi gotis wihe an mih geleit
 0,21050 vn- sol niht vf min hovbit komen
 0,21051 da von min har mir werde benomen
 0,21052 wan wurde mir dc abe geschorn
 0,21053 so were min sterche gar virlorn
 0,21054 vn- were al dvi kraft da hin
 0,21055 von der ih svs gesterchit bin .”

0,21056 Alse do Dalila virnam
0,21057 dvi mere . vn- dien z ende kam
0,21058 wa von der degin ellenthafft
0,21059 Sampson hate solhe kraft
0,21060 si tet dien heidin sa zehant
0,21061 mit ir botschaft irchant
0,21062 si hete irvarn ir willen gar
0,21063 dc si kemin . vn- ir dar
0,21064 brehtin die miete
0,21065 vmbe die si in virriete
0,21066 des starchen Sampsonis lip
0,21067 die miete die das valsche wip
0,21068 vorderte . die brahten sie
0,21069 vn- waren virstolne nahe hie
0,21070 mit grozir kraft als si geriet
0,21071 do dvi heidenisschvi diet
0,21072 wc komen . vn- gewerte
0,21073 der miete . der si gerte
0,21074 si schvoph mit trvgenischin groz
0,21075 dc sih Sampson vf ir schoz .
0,21076 leite . vn- entslief . do nam iesa
0,21077 Dvi vngetrviwe Dalila .
0,21078 ein schaere . vn- beschar
0,21079 Sampsons sin hovbit gar
0,21080 vn- stiez in smeliche von ir .
0,21081 mit viendis vientlichir gir
0,21082 liefn do die heidin hin
0,21083 vf in . vn- viengin in
0,21084 wand er was worden ane kraft
0,21085 den ivngin degin ellinthaft
0,21086 blanten die heidin sa zehant
0,21087 als vins dvi warheit tvot irchant .
0,21088 Do Sampson irblendit wart
0,21089 in namin an der selbin vart
0,21090 die heidin . vn- fvorten in
0,21091 in dem lande her . vn- hin
0,21092 vn- mvoten in mit spote vil
0,21093 i- der selbin tage zil
0,21094 fvorten si in gein Gaza
0,21095 vn- twungin in . dc er alda
0,21096 mveste do belibin
0,21097 vn- eine kvirne tribin
0,21098 vn- in maln gar ir chorn
0,21099 dem ivngen helde wolgeborn .
0,21100 leiten si zvo sterchvi wip
0,21101 die wol gewahsenin lip
0,21102 hatten alse gnvoge sint
0,21103 dc si bi im sterchvi kint

0,21104 trvegin . vn- gewunnin . do
0,21105 nv diz geschehin was also
0,21106 Sampson . do begvndin
0,21107 i- disin selbin stvndin
0,21108 widir wahsen sinvi har
0,21109 vn- sinvi errvi kraft alwar
0,21110 gewan er widir al sin kraft
0,21111 nv samde sih dvi heidinschaft
0,21112 von allem dem lande witen .
0,21113 dar z ir hohsten hohgeziten
0,21114 i- der si nah ir e gebote
0,21115 solten opfirn ir gotte
0,21116 der wc geheizen Dagon
0,21117 nv wart der starche Sampson
0,21118 ovh dvrh den spot besant da hin
0,21119 das er spilte da vor in
0,21120 vn- dc si spotin sin da mite
0,21121 dvrh also spotliche site
0,21122 wart Sampson aldar besant
0,21123 dc er da mite wurde geschant .
0,21124 nv saminde sih dvi heidinschaft
0,21125 vn- ir herschaft mit al ir kraft
0,21126 i- dc betehvz da sie
0,21127 ir opfir wolten bringen hie
0,21128 dem valschin Dagone
0,21129 ze lobe . vn- ovh ze lone
0,21130 dc in was ane wer gesant
0,21131 ir leidistir vient in ir hant .
0,21132 vn- wart Sampson ovhc bracht aldar .
0,21133 da die heidenischen schar
0,21134 ir gote ir opfir brahten
0,21135 als si ez do gedahten
0,21136 do was mit grozer richeit
0,21137 ein rilich wirtschart da bereit
0,21138 vf einim hohin Palas
0,21139 do dvi herschaft gesezzen was
0,21140 ze tische als ich gelesen han
0,21141 Sampson mveste vor in stan
0,21142 dc ir spotlih vngelimpl
0,21143 mit im tribe irn schimpl
0,21144 des mit im da vil geschach .
0,21145 vil povils man da zvo dringen sach .
0,21146 dc si sinis schimpfis nemin war
0,21147 nv was dc hvs bewelbet gar
0,21148 dc ez vf hapte . vn- ez besloz
0,21149 gewelbit vf zwo svile groz
0,21150 die stvondin nah einandir
0,21151 dar kam Sampson . do vand ir

0,21152 grifinde die svile da
 0,21153 ze sinim knabin sprah er sa
 0,21154 “gip mir die svile in die hant
 0,21155 beide . vn- tvo mir si bechant
 0,21156 dc ih mih dr an geleine
 0,21157 vnz ich gervowe ein kleine .”
 0,21158 Sin knabe tet . als er in bat
 0,21159 er fvorte in reht vnz an die stat
 0,21160 da er die svile irgrief mit kraft
 0,21161 do sprah der degin ellenthafft
 0,21162 “nv wil ich sterbin . vn- gebin
 0,21163 dvrh dise heidene min lebin
 0,21164 dc ovh si mit mir ligen tot”
 0,21165 sin manlich eln im gebot
 0,21166 dc er die svile gezvhte
 0,21167 von stat so sere gervhte
 0,21168 dc der hohe Palas
 0,21169 vn- swas dar an gezimbirs was
 0,21170 vil gar zirviel . vn- zirbrast .
 0,21171 dvi mvre . vn- des gezimbirz last
 0,21172 Sampsonen slvog . vn- al die schar
 0,21173 die die heidin brahten dar
 0,21174 der . die ze tische sazin
 0,21175 vn- die mit vroidin azen
 0,21176 was drvi tvsint . ane die
 0,21177 die dvrh die kvrzewile waren hie
 0,21178 da Sampson vf dem Palas
 0,21179 der heidene spil . vn- gampil was .
 0,21180 der was so vil . das ane zal .
 0,21181 belibin mvesten vbiral
 0,21182 vngeprveft . vn- vngezalt
 0,21183 alsvs tote der degin balt
 0,21184 Sampson nah tode lvite me
 0,21185 dann er hete irtoedet e
 0,21186 des vins dvi schrift vrchvinde git
 0,21187 do kamen an der selbin zit
 0,21188 sine vrvinde . vn- namen in da
 0,21189 vn- fvorten in von dannen sa
 0,21190 hin hein da er mit richeit
 0,21191 zvo sinin vordern wart geleit .
 0,21192 do er als ih ez han gelesin
 0,21193 zweinzig iare was gewesen
 0,21194 vogit der jsrahelschen diet
 0,21195 von dirre welte er hinnin schiet .
 0,21196 vn- hate mit werlichin siten
 0,21197 dem lvite solhin vride irstriten
 0,21198 dc nieman lie deheine vart .
 0,21199 der iendir im ze mvote wart

0,21200 er fvor an angist swa sin sin
0,21201 im geriet ze varne hin
0,21202 dc si mvesten e bewarn
0,21203 wan nieman getorste varn
0,21204 von der jsrahelschin schar
0,21205 ane geleite dar . noh dar .
0,21206 Sampson do der virdarb also
0,21207 nah im was bi dien ziten do
0,21208 i- jsrahel rihtere niht
0,21209 vn- was dc lvit gar vmberiht
0,21210 vn- lepton swie si wolten
0,21211 andirs danne si solten
0,21212 der man tet swas in dvhte gvot .
0,21213 dvi irrecheit . der tvmben mvot
0,21214 virirte do der lvite vil
0,21215 da von in der tage zil .
0,21216 dc lvit mit manegir schvlde
0,21217 virworhte gotis hvlde
0,21218 da von do ein vmbilde irgie
0,21219 von dem ih nv wil sprechin hie
0,21220 dvrh das do bi dien selbin tagin
0,21221 ein ganz geslehte wart irslagin
0,21222 dc kvinne gar von Beniamin
0,21223 dar nah als ih bewisit bin
0,21224 wil ich ivh rehte sagen wie
0,21225 vn- wa von diz vmbilde irgie .
0,31681 als er gebot dvrh solhin site
0,31682 dc ime gevestent wurde mite
0,31683 dvi wihe vollecliche
0,31684 dar zvo krone . vn- riche
0,31685 dar nah leit er in wisir kvir
0,31686 in mit gotis lere fvir
0,31687 dc si an beten einin got
0,31688 vn- iemir leisten des gebot
0,31689 vn- me encheinin
0,31690 an bettin wan den einin
0,31691 vn- mit welhin sachin
0,31692 si dem soltin machin
0,31693 ein tempil sinir heilickeit
0,31694 do in wart von im fvir geleit
0,31695 gotis lere als er si lerte
0,31696 ir iegeslichir kerte
0,31697 von hove hin widir hein zehant
0,31698 von dannen er dar was besant .
0,31699 Nv began der selbin zit
0,31700 siechin der edil kvinig David
0,31701 wan ime begvnde nahin
0,31702 sin tot . vn- zvoz im gahin

0,31703 des er vil gehist sere empfant
 0,31704 fvir sih besant er sa zehant
 0,31705 Salomonin . vn- sprah
 0,31706 do er in fvir sih komen sah
 0,31707 “svn . dv solt vollecliche
 0,31708 got von himilriche
 0,31709 vebin . vn- in han ze gote
 0,31710 vn- nah sinim gebote
 0,31711 gotis e behalten . der vrhap
 0,31712 got vins mit Moysese gap
 0,31713 die solt v wol behalten
 0,31714 vnde mit stete ir vil gerne walten .
 0,31715 Svn dar zvo si dir bechant
 0,31716 vn- wis des vil wol gemant
 0,31717 dc mir got diz riche
 0,31718 gehiez ewecliche
 0,31719 ze gebinne . vn- minin nahkomen
 0,31720 wrd es niemir benomen
 0,31721 ob si behieltin sin gebot
 0,31722 sid dc mit dem gedinge got
 0,31723 die krone vins gegeben hat
 0,31724 so solt v ane missetat
 0,31725 gein im vn- ane svinde
 0,31726 behalten sin vrchvinde
 0,31727 vn- des mit stetim mvote pflegin
 0,31728 sih das tv von sinin wegin
 0,31729 gewendest niemir dinin sin
 0,31730 dv kerest dinin mvot an in
 0,31731 Svn do ih svindin mohte
 0,31732 vn- der gewalt mir tohte
 0,31733 al nah minis herzen gir
 0,31734 nieman werte svinde mir
 0,31735 do hvot ich mih dc ih nie
 0,31736 vnrechte svinde gein gote begie
 0,31737 wan an einim wibe
 0,31738 an vrias libe
 0,31739 dem ih mit svindin sin wip
 0,31740 nam . vn- hiez nemen sin lip
 0,31741 dar vmbe got sinin gerih
 0,31742 kerte billiche an mich
 0,31743 Svn ih wil ovh klagin dir
 0,31744 vn- wil dih biten das tv mir
 0,31745 rechest den grozen vnfvog
 0,31746 an Ioabe . dc er slvog
 0,31747 i- minim geleite abnerin .
 0,31748 den vil ediln fvirsten herin .
 0,31749 an dem er min geleite brah
 0,31750 do man in von mir scheidin sah

0,31751 mit svone in frvindis sichirheit
 0,31752 svn ovh la dir wesin leit
 0,31753 dc amasa lag von im tot
 0,31754 dem ih ovh min geleite bot
 0,31755 das rich ovch an im dvrch mich
 0,31756 wan er sinin balderich
 0,31757 begoz mit ir blvot .
 0,31758 hab ovh in dinim mvot
 0,31759 das tv rechest mir da bi
 0,31760 dc mih der valsche Semey
 0,31761 alse lasterlich beschalt
 0,31762 do mih absalonis gwalt
 0,31763 virtreip . vn- ih im entran
 0,31764 do schalt mih der selbe man
 0,31765 vil lasterliche dc virnim
 0,31766 dc solt v rechen so an im
 0,31767 dc ih wol sichirliche
 0,31768 var in minim riche
 0,31769 vil liebir svn vn- bewar
 0,31770 dc er iht gervowet var
 0,31771 hin zvo der helle ane gerich
 0,31772 dc er beschalt so sere mich
 0,31773 ane schvlde . svn dc rih
 0,31774 an sinim libe svn dvrh mih
 0,31775 vn- behvete eht ie dar vnd' gotis
 0,31776 vn- der e . vn- gotis gebotis ."
 0,31777 Dar nah niht vbir lange zit
 0,31778 slief der edil kvinig David
 0,31779 sinir vordern slaf . so das starp .
 0,31780 vn- im des libis lebin virdarp
 0,31781 vo- dem sin heilig lebin schiet
 0,31782 do er gepflag der gotis diet .
 0,31783 in kvinigis namen vierzig iar
 0,31784 sibirzig was er alt fvir war
 0,31785 David in dein tagin do
 0,31786 vn- hate sinvi zit also
 0,31787 gelept . dc er nah gots gebote
 0,31788 nie gesvindete gein gote
 0,31789 er en wa-delt es nah schvldin
 0,31790 dein svezen gotis hvlden .
 0,31791 so dc im got die schvlde
 0,31792 liez . vn- gab im sine hvld
 0,31793 mit gotlichir gvete
 0,31794 sin seleclich gemvete
 0,31795 dc was gein gote alse reht
 0,31796 also virrihtit . vn- ebinsleht
 0,31797 dc got selbe von im sprah
 0,31798 do er sin reinis herze irsah

0,31799 also reine . vn- alse reht
 0,31800 "ih han Davidin minin kneht
 0,31801 nah minim herzen fvndin
 0,31802 der dvrh mih z allin stvndin
 0,31803 allin minin willin tvot
 0,31804 des weiz ich in gein mir gemvot"
 0,31805 diz wort gediende werde
 0,31806 David hie vf der erde
 0,31807 da von er wuinnencliche
 0,31808 treit ze himilriche
 0,31809 die iemir wernde krone
 0,31810 die im got ze lone
 0,31811 in sinim riche hat bereit
 0,31812 mit ewelichir stetekeit
 0,31813 da im dc iemir werndes lebin
 0,31814 mit lebind' vroide ist gegeben
 0,31815 nah werchin ze lone
 0,31816 von dem kvinege Salomone
 0,31817 wart er ze Ierusalem geleit
 0,31818 mit kviniglichir werdeckeit .
 0,31819 vn- wart dar nah sit langvi zil
 0,31820 geklagit von dein sinin vil
 0,31821 die sih iamirs kvndin wern
 0,31822 do si solten sin embern
 0,31823 vn- sinvi kvinigriche
 0,31824 er wart so riliche
 0,31825 begrabin . dc vins Iosephvs
 0,31826 mit rehter warheit scribit svs
 0,31827 dc ahte hoerde richeit
 0,31828 zvoz im wurdin geleit
 0,31829 i- ahte vesten sarchen
 0,31830 vesten . vn- starchen
 0,31831 mit zovbirlichir meistirschaft
 0,31832 vn- mit virborgenir liste kraft
 0,31833 dc si nieman fvnde
 0,31834 vn- nieman vinden kvnde .
 0,31835 Doh vant ir einin dar nah sit
 0,31836 vbir manegir iare zit
 0,31837 Iohannes Ircanus
 0,31838 als vins scribit Iosephvs
 0,31839 vn- vbirwant mital die not
 0,31840 die im mit vrlvige bot
 0,31841 vn- mit vientlichir kraft
 0,31842 dvi virworhtvi heidinschaft
 0,31843 als si waren ie gewon
 0,31844 vn- stifte doh da von
 0,31845 ze Ierusalem den spital
 0,31846 da manig notdvirftig mal

0,31847 dvrh got almvosens vil geschiht
0,31848 als man teglih mit warheit siht
0,31849 vn- iemer mere sehin mag
0,31850 werliche vntz an den ivngesten tag
0,31851 biz daz dvi welt mag gestan
0,31852 gnvogir iehe . vn- wanlih wan
0,31853 giht . dc hie ein welt ge abe
0,31854 mit zal . vn- al hie ende habe
0,31855 des Iehe der ez welle iehin
0,31856 ih wil mit warheit mih virsehin
0,31857 dc ein schidvnge were getan
0,31858 als ih si vndirscheidin han
0,31859 Dar nah der selbin iaren zit
0,31860 do der edil kvinig David
0,31861irstarp . do wart dvi krone
0,31862 sinim svne Salomone
0,31863 der von im was geborn
0,31864 do der ze kvinege was irchorn
0,31865 vn- almehtelicliche kvinig was
0,31866 Davidis svn adonias
0,31867 von dem ih han gesprochen e
0,31868 gie einis tagis zvo Bersabe
0,31869 Salomonis mvoter do
0,31870 dvi was sinir kvnft vnfro
0,31871 vn- irschrach do r fvir si kam
0,31872 wan er was ir mit nide gram
0,31873 si irschrach do si in sah
0,31874 irchomenliche si do sprah
0,31875 “kvmist v mit vride her . odir wie .”
0,31876 “ia . ih bin mit vride hie”
0,31877 sprah er . “vn- wolte biten dih
0,31878 das tv betist fvir mih
0,31879 den kvinig . dc er ze wibe mir
0,31880 gebe abysag . dc ist min gir
0,31881 minis vaters frvndin .” do tet
0,31882 Bersabe nah sinir bet
0,31883 vn- gie da si den kvinig vant
0,31884 der saz . vnde als im wart bechant .
0,31885 das sin mvoter fvr in gie
0,31886 sinir zvht er si geniezen lie
0,31887 vn- stvont schone vf von sinir stat
0,31888 nah grvoze er si sizzen bat
0,31889 vn- erte an ir mit hohir zvht
0,31890 dc er ir kint was vn- ir frvht .
0,31891 Er vragte si der mere
0,31892 dvrh wc si komen were .
0,31893 si sprah . “ih bin komen her
0,31894 das tv tvest des ich nv ger .”

0,31895 er sprah "liebvi mvotir min
0,31896 sag mir die ger . dvi gabe ist din"
0,31897 si sprah "da wil ih biten dich
0,31898 das tv ze wibe gebest dvrh mih
0,31899 ane zornlichen bag
0,31900 adoniase abysag
0,31901 dc dvnchit mich ein werder lon ."
0,31902 "mvoter" sprah do Salomon
0,31903 disvi bete ist gar ein wiht
0,31904 war vmbe bete dv mih niht
0,31905 minir krone . die het ich
0,31906 gelan . vn- gegebin dvrh dich .
0,31907 nv weiz ih rehte wol den list
0,31908 wie disvi bete komen ist .
0,31909 fvir war binamen Ioabis rat
0,31910 gefrvimit dise bete hat
0,31911 dar vf . vn- het ich s getan
0,31912 das man gesprochen mveste han
0,31913 "Salomon ist vngemvot
0,31914 dem er nv geliche tvot .
0,31915 dc er dvrh iemannis rat
0,31916 sinis vatirs frvndinne hat
0,31917 sinim brvodere gegeben
0,31918 das widir got ein svntlich leben .
0,31919 ist . vn- in Israhel geschihin
0,31920 das er als vnreht ist irsehin
0,31921 des sol er billiche
0,31922 virliesin sin riche
0,31923 wand er z mit warheit ane wan
0,31924 niht wan dvrch Vorhte hat getan ."
0,31925 Doch ist ez nieman rehte kvnt
0,31926 ob si ie ze keinir stvnt
0,31927 bi minis vatirs libe
0,31928 von im ie wart ze wibe
0,31929 wan das in wanis zwivil stat
0,31930 so were z gar ein missetat
0,31931 dvi mir gein gote sere
0,31932 kranchte lip . vn- ere
0,31933 da von ez sol sin vormitten .
0,31934 das er s getorste ie gebitten
0,31935 als das got lept des mvoz er gebin
0,31936 noch hvite beidvi lip . vn- sin lebin .
0,31937 wan sins vnrehten herzen rat
0,31938 virteilit im sin lebin hat
0,31939 dar an er mih hat virlorn .
0,31940 der edil kvinig hohgeborn
0,31941 in disim zorne sant er hin
0,31942 vil balde . vn- hiez slahin in

0,31943 einin helt der hiez Banayas
0,31944 der tet als er geheizen was
0,31945 vn- im Salomon gebot
0,31946 von im lag adonias tot .
0,31947 der in vmbe die schvlde slvog .
0,31948 das er der bete ie gewuog .
0,31949 dvi dem kvinege was so leit
0,31950 mit kvineclichir wirdeckeit
0,31951 hiez in der kvinig riche
0,31952 begraben herliche .
0,31953 Do Ioab das horte sagin
0,31954 das adonias was irslagin
0,31955 er vorhte ovh des kvinegis zorn
0,31956 vn- sin lebin han virlorn
0,31957 das sin schvlde im virworhte
0,31958 in twang dvi groze vorhte
0,31959 das er dvrh genesinnis gelt
0,31960 vlohe in das heilige gezelt
0,31961 vn- vieng in grozer swere
0,31962 zvoz im den altere
0,31963 vn- wande mit dein listen
0,31964 sin lebin fvirbas fristen
0,31965 dc er wuiste han virlorn
0,31966 dem ediln kvinige wolgeborn
0,31967 wart do getan das mere kvnt
0,31968 do sante nah im sa zestvnt
0,31969 der kvinig daz er keme
0,31970 fvir in . vn- da virneme
0,31971 wes er in an spreche
0,31972 vn- was er an im reche
0,31973 moeht er mit rehte sih gern
0,31974 vn- vor im sinin tot irwern
0,31975 das er keme vn- tete das .
0,31976 do vorht er Salomonis haz
0,31977 so sere vmbe sin geschiht
0,31978 dc er wolte dannen niht
0,31979 diz wart abir dem kvinege irka-t
0,31980 do sant er dar sa zehant
0,31981 vn- hiez in ze tode sa
0,31982 slahin bi dem altir da .
0,31983 Do dc also geschihin was .
0,31984 vn- Ioab . vn- adonias
0,31985 genamen ir gediendin lon
0,31986 do besante Salomon
0,31987 den ewarten abyatar
0,31988 als er was komen fvir in dar
0,31989 er sprah “dir si fvir war geseit
0,31990 mit endelichir warheit

0,31991 das tv des todis mvestis sin
 0,31992 wan das tv mit dem vatir min
 0,31993 hast mit erbeitlichin sitin
 0,31994 so manege erbeit irliten
 0,31995 dv trvege mit im die arche vor
 0,31996 vn- gotis heilickeit embor
 0,31997 do absalon in vmbe treip
 0,31998 wan din trviwe do beleip
 0,31999 stete an im . des solt v
 0,32000 geniezen vmbe dc lebin nv
 0,32001 das tv virhorn mvesist han
 0,32002 ob dv s niht hetist getan .
 0,32003 nv var enweg . wis hie niht me
 0,32004 vn- wis in anatole .
 0,32005 dv solt ewarten ampt lan
 0,32006 dc Sadoch sol fvir dihan”
 0,32007 alsvs wart im genomen abe
 0,32008 ewarten reht . wurde . vn- habe .
 0,32009 dvi dar an mit grozer richeit lag
 0,32010 deme . der da ewartin amptis pflag
 0,32011 vn- wurden da biz vf ein ort
 0,32012 beweret Samvelis wort
 0,32013 dvi er in sinir kintheit
 0,32014 Ely da vor hate geseit .
 0,32015 nah gotis warheit in Sylo
 0,32016 do er im sagte also
 0,32017 er mveste ewarten ampt lan
 0,32018 vn- dc solte nah im han
 0,32019 sin vient dvrh die schvlde hoh
 0,32020 dc er sine svine niht zoch
 0,32021 die mit manegir vngenvht
 0,32022 vnrehtis pflagin . mit vnzvht
 0,32023 dc arnete sin geslehte do
 0,32024 mit der vnwurde also
 0,32025 dc ez die werdekeit virlos
 0,32026 an die si got von erst irchos
 0,32027 dc me dan in die vierden art
 0,32028 virworht mit hovbitschvldin wart .
 0,32029 Do Ioab virderbit was
 0,32030 vn- dar zvo adonyas
 0,32031 lag vmbe sine schvlde tot
 0,32032 alse Salomon gebot
 0,32033 vn- sin vientlichvi ande .
 0,32034 nah Semey er sande
 0,32035 des itewize manigvalt
 0,32036 den kvinig Davidin e beschalt
 0,32037 do in mit her mvote absalon .
 0,32038 z im sprah der kvinig Salomon

0,32039 do er mit vorhten fvir in gie
 0,32040 “zimbir ein hvs . vn- wis hie
 0,32041 i- dinem hvse i- dirre stat
 0,32042 da din gemah dir wirt gesat
 0,32043 vn- hvete” sprah Salomon
 0,32044 “das tv iemir komest vbir Cedron .
 0,32045 odir binamen dv mvost gebin
 0,32046 ane wer . lip . vn- lebin
 0,32047 des kast v niemir werdin vri”
 0,32048 “herre” sprah do Semey
 0,32049 “dv hast gein mir gesprochin wol .
 0,32050 der rede ih gerne volgin sol
 0,32051 willecliche vn- ane var”
 0,32052 alsvs beleip er zwei iar
 0,32053 dc er vzwendig der stat
 0,32054 dc selbe zil nie fvoz getrat
 0,32055 doh brah er s . des mvest er gebin
 0,32056 vmbe die schvlde do sin lebin
 0,32057 vn- vmbe der alten schvlde haz
 0,32058 dc er sin selbiz so virgaz
 0,32059 dc er den gotis degin balt
 0,32060 Davidin alse sere beschalt .
 0,32061 Hie bi tvot vins dvi scrift irchant
 0,32062 wie die waren genant
 0,32063 die Salomon hate gesat
 0,32064 an sins gewaltis hohste stat
 0,32065 die mit ir pflege namen war
 0,32066 sinir lande . sin gwaltis gar
 0,32067 doh als er in die pflege beschiet
 0,32068 vn- mit wisheit vndirschiet
 0,32069 der nennit dvi scrift niht wan dri .
 0,32070 swas ir mit zal halt mere si .
 0,32071 der hat dvi scrift hie niht genant
 0,32072 wan dc si tvot die drie irchant .
 0,32073 der degin Bananyas
 0,32074 sin hohste herzoge was
 0,32075 vn- gewaltig mit kraft
 0,32076 vbir alle sine ritterschaft
 0,32077 Sadochis svn sin scriber was
 0,32078 der sine heinliche alle las
 0,32079 vn- sinvi reht berihte
 0,32080 mit scrift sin brieve tihte
 0,32081 mit pflege Natanis svn ovh pflag
 0,32082 der . gein dein er sih bewag
 0,32083 dc si sinis libis soltin pflegin
 0,32084 dc wc Natanis svn ein degin .
 0,32085 der von iegelichim kvinne was
 0,32086 vier tvsint als ih hie vor las

0,32087 die des kvinegis pflagin
 0,32088 vn- nah ir ordin ladin
 0,32089 vmbe in ze ringe in alle sit
 0,32090 als ez da vor e schvof David
 0,32091 Salomon der riche
 0,32092 vmbemvrte werliche
 0,32093 mit nwiwen mvren al die stat
 0,32094 er gebot . hiez . vn- bat .
 0,32095 dc alte gemvire brechin nidir
 0,32096 vn- abir dar nah mvrin widir
 0,32097 mit vesten tvirnin hoch irhabin
 0,32098 inwendig tiefin witen grabin
 0,32099 die die stat vmbegiengin
 0,32100 vn- die veste vmbeviengin
 0,32101 werliche als der kvinig gebot
 0,32102 fvir vientlich vrlviges not
 0,32103 der si wart sit vil an geleit
 0,32104 in dirre hohin werdecheit
 0,32105 nam er do sinim libe
 0,32106 von egipte im ze wibe
 0,32107 eins kvinegis tohter sa zehant
 0,32108 der ptolomeus was genant
 0,32109 vn- began in sinin tagin
 0,32110 gote vil gar wol behagin
 0,32111 wan swas dannoh der gotis kneht
 0,32112 tet . dc wc gvot . vn- reht
 0,32113 ane dc eine . das er gote
 0,32114 widir gotis e gebote
 0,32115 bette . das waren altir die gote
 0,32116 waren widir gotis gebote
 0,32117 ze Ierusalem gemachit do
 0,32118 des wisit vins dvi scrift also .
 0,32119 Do Salomon svv lepte .
 0,32120 i- solhim vride swebte
 0,32121 das im leidiz niht geschah
 0,32122 wan das im ere vn- gemah
 0,32123 wuohs mit grozer richeit kraft
 0,32124 er gedahte in sinir herschaft
 0,32125 das er do mveste bringin
 0,32126 mit heilichlichin dingin
 0,32127 sin opfir gote in Gabaon
 0,32128 do bereite Salomon
 0,32129 sih z em gotis opfir sa
 0,32130 gein Gabaon . vn- brahte da
 0,32131 gote reynecliche
 0,32132 tvsint opfir riche .
 0,32133 dvi got gnedecliche empfie
 0,32134 des nahtis . do er slafen gie

0,32135 vn- er entslief . im wart zehant
 0,32136 gotis stimme in trovme irchant
 0,32137 vn- leit im drier wunsche kvir
 0,32138 mit wal von im ze habinne fvir
 0,32139 ob er wolte mit kraft
 0,32140 an sinin viendin sigehaft
 0,32141 werdin nah sinim mvote
 0,32142 odir das er von gvote
 0,32143 hete die grozen richeit
 0,32144 odir dc im were bereit
 0,32145 dvi hohstvi wisheit die ieman
 0,32146 bi sinin ziten nie gewan .
 0,32147 Salomon der kvinig wis
 0,32148 irchos fvir dirre zweier pris
 0,32149 signvft . vn- gvotis richeit
 0,32150 dvi im da waren fvir geleit .
 0,32151 ze habinne . er sprah “liebir herre min
 0,32152 mvig es in dinin hvldin sin
 0,32153 so gip mir alse wisin sin
 0,32154 vn- solhir wisheit gewin .
 0,32155 dc ih din lvit virrihten
 0,32156 kvinne . vn- mvige virslihten
 0,32157 swa dc reht sih krvimbe mir .”
 0,32158 do sprah got . “nah dinir gir
 0,32159 solt v der bette sin gewert
 0,32160 sit dv der wisheit hast gegert
 0,32161 vn- sigenvft der viende niht
 0,32162 dc man die ivngen miden siht
 0,32163 i- ir ivgint . dvrh ivngin mvot
 0,32164 vn- das tv virspreche gvot
 0,32165 vn- weltliche richeit
 0,32166 so sol werdin dir bereit
 0,32167 sigenvft . so das tv sigehaft
 0,32168 iemir sist mit sigendir kraft
 0,32169 an dinin viendin al din lebin
 0,32170 ovh wil ih dir nah wunsche gebin
 0,32171 die grosten richeit die ieman
 0,32172 vor dir in kvinegis namin gwan
 0,32173 odir nah dir sol gewinnen
 0,32174 ovh wil ih dir mit sinnin
 0,32175 gebin die hohsten wisheit
 0,32176 dvi mannis sinne ie wart bereit .”
 0,32177 Do Salomon irwachete
 0,32178 nah slaffe er vf sih makete .
 0,32179 er vroite in sinim mvote sih
 0,32180 der grozen gabe seleclih
 0,32181 dvi nah wunslichir wisheit
 0,32182 im an witzen was bereit

0,32183 ze habinne fvir alle die
 0,32184 vor im geborn wrden ie
 0,32185 vn- nah sinin ziten sit
 0,32186 i- der selben tage zit
 0,32187 kerte er in Ierusalem hin hein
 0,32188 dvrh die vroide dvi do schein
 0,32189 i- sinim gemvete ho .
 0,32190 gieng er fvir gotis arche do
 0,32191 vn- viel in demveteclichir kvir
 0,32192 got an betende da fvir .
 0,32193 der die gnade an im da tet
 0,32194 do er gesprah da sin gebet
 0,32195 riliche nah der e gebote
 0,32196 braht er sin rilich opfir gote
 0,32197 als in sin wisheit lerte
 0,32198 dvi sih an im so merte
 0,32199 das vor sinir zit nieman
 0,32200 so hohe wisheit me gewan
 0,32201 Dar nah kvirzeliche an einem tage
 0,32202 kamen nah der warheit sage
 0,32203 fvir Salomonen zwei wip
 0,32204 die dvrh ir vnvertigen lip
 0,32205 dvi scrift vnvertig hat genant
 0,32206 der sprah einvi sa zehant
 0,32207 do si fvir den kvinig kam
 0,32208 vn- er ir beidir rede virnam
 0,32209 “herre ih bitte dih das tv
 0,32210 mine klage vernemest nv
 0,32211 ih vn- diz wip . wir waren
 0,32212 sament . vn- gebaren
 0,32213 i- einim hvse zwei kindelin
 0,32214 do wir begvndin sament sin
 0,32215 alse noh genvege sament sint
 0,32216 eins nahtis irdrvhte si ir kint
 0,32217 vn- do si des rehte empfant
 0,32218 so daz si z bi ir totis vant
 0,32219 si leite ir totis kindelin
 0,32220 zvo mir . vn- stal dc min
 0,32221 als ih do soivgin wolte
 0,32222 min kint als ih solte
 0,32223 dc kint ih bi mir totis vant
 0,32224 do wart vil schiere mir bechant .
 0,32225 dc ez min kindelin niht was
 0,32226 vn- ez dc wc des si genas .”
 0,32227 Dvi einvi sprah “dv lvigist
 0,32228 mit lvge dv dih trvigist .
 0,32229 din kint ist tot . vn- lept dc min
 0,32230 dv hast irtoedit dc din

0,32231 dc mine ih noh lebinde han
 0,32232 dc weiz ih wol gar ane wan ."
 0,32233 "niht dv hast das dine
 0,32234 irdrvckit . vn- dc mine
 0,32235 virstoln ." sprach ab' dvi and' do .
 0,32236 nv do dise kre kriegeten also
 0,32237 vn- des krieges vil geschah
 0,32238 der kvinig Salomon do sprach
 0,32239 "wie sol ih diz virrihten
 0,32240 vn- disen krieg virslihten
 0,32241 des alse vil geschiht alhie
 0,32242 disvi heizit liegin die
 0,32243 vn- dvi andir abir si
 0,32244 so spriht ienvi abir da bi .
 0,32245 dv lvigist . min kint lebinde ist
 0,32246 dc dine ist tot ." den besten list
 0,32247 den ze gerihte ie kvinig vant
 0,32248 irdahte Salomon zehant
 0,32249 z irvindic die warheit
 0,32250 mit rehter bischaft vnderseheit
 0,32251 als ein iegelih rihter sol
 0,32252 er wuisse dc binamen wol
 0,32253 sehe ein wip ir kindelin
 0,32254 toedin . dc were ir hohster pin .
 0,32255 ob ir von warheit were bechant .
 0,32256 dc si sin mvoter were genant
 0,32257 da bi wuist er wol dc ein wip
 0,32258 einis vroemdin kindis lip
 0,32259 vil schiere virklagit hete .
 0,32260 ob man den tot im tete
 0,32261 wan mveter di irbermig sint
 0,32262 irbarmit hercechlich ir kint
 0,32263 vn- einis vromdin kindis lip
 0,32264 irbarmit kleine ein hertis wip
 0,32265 Diz kvnde wol bedenchen
 0,32266 vn- velsche lvige krenchen
 0,32267 der edil gotis degin wert
 0,32268 er sprach "bringint her ein swert
 0,32269 vn- slahint entzwei dc kindeli
 0,32270 so ez danne geteilit si
 0,32271 so gebint ietwederre dar ir teil
 0,32272 vn- dvi si danne ir teilis geil
 0,32273 wan ir nah rehte reht geschiht"
 0,32274 "nein herre des sol wesin niht"
 0,32275 sprach dvi des kindis mvot' hiez
 0,32276 der iamir in ir herce stiez
 0,32277 so sendis iamirs klagindin pin
 0,32278 ob man irtote ir kindelin

0,32279 dc s iemir mveste sin vnfro
 0,32280 si irschrah vil sere . vn- sprah also
 0,32281 “niht . gnade herre irwint
 0,32282 gib dirre lebinde hin das kint
 0,32283 wand ez ist mit warheit ir .”
 0,32284 “wc ist dir her vmbe . odir mir
 0,32285 ob man diz kint zirteilt hie”
 0,32286 sprah dvi . der niht ze herzen gie
 0,32287 des vroemdin lebindin kindis tot .
 0,32288 dem si so ringe wag die not .
 0,32289 als ir geberde da viriach
 0,32290 Salomon der wise sprah
 0,32291 “tvont her das kint man sol ez gebin
 0,32292 der . dvi da sorget vmbe sin lebin .
 0,32293 wan si sin rehtvi mvotir ist”
 0,32294 do gab man an der selbin vrist
 0,32295 dc kint der rehten mvoter sin .
 0,32296 der andir tet man schiere schin
 0,32297 dc si was ein ivbil wip
 0,32298 wan zirberte ir den lip
 0,32299 mit einim reitel grvene
 0,32300 also wart ir ir chvene
 0,32301 in getribin das ist war
 0,32302 seht wc wolte si do dar
 0,32303 wan tet da dem reht das sin
 0,32304 svs tet mit hohin witzzen schin
 0,32305 z ir allir angesihte
 0,32306 sin erste gerihte
 0,32307 SaloMon der wise degin
 0,32308 vn- dc er kvnde wisheit pflegin
 0,32309 dc alle die sine entsazen
 0,32310 vn- sine wisheit mazen
 0,32311 z er hohsten wisheit die got ie
 0,32312 da vor dekeinim man virlie
 0,32313 gerihte ze verrihtenne
 0,32314 vn- die warheit ze verslihtenne
 0,32315 des ellvi sinvi riche
 0,32316 sih vroiten algeliche
 0,32317 vn- getorste dannen hin
 0,32318 nieman tvon niht widir in .
 0,32319 Salomon der riche
 0,32320 teilte do wisliche
 0,32321 in zwelf teile sinvi lant
 0,32322 iegeslichim teile was benant
 0,32323 ein pfleger . der sin solte pflegin
 0,32324 der selbe mveste sih bewegin
 0,32325 als der kvinig wolte
 0,32326 dc er dienin solte

0,32327 sinin manot dvrh dc iar .
0,32328 hie bi seit ovh dvi scrift fvir war
0,32329 von der richin spise
0,32330 die der kvinig wise
0,32331 mveste ze iegelichim tage
0,32332 han . nah rehter warheit sage
0,32333 als gotis warheit wisit mih
0,32334 er mveste allirtegelih
0,32335 similmelwis ze brote han
0,32336 swa sin zervnge solte irgan
0,32337 dein . die ze tische waren gesat
0,32338 von im an der herren stat
0,32339 vn- andirs melwis als ih las
0,32340 dc in drizig Choeren was .
0,32341 vn- sehzig koere des gesindis schar
0,32342 die vndirgesinde . hiezen gar
0,32343 diz wc tegelih sin brot
0,32344 als der zervnge mez gebot
0,32345 dvi sin . vn- sinis hovis was
0,32346 an einir glose ih dc laz
0,32347 zwelf soime sint ein Chor genant
0,32348 als ein ros geladin ist irchant .
0,32349 zewelf Ochsen veizt gemestit wol
0,32350 als man ein rint noh mesten sol
0,32351 vn- zwenzig weidOhsin groz
0,32352 der iegeslichis slehtes noz
0,32353 ane mastvnge gar
0,32354 die weide ze lipnar
0,32355 vn- hvndirt widere veizt irchant
0,32356 als man do die besten vant
0,32357 ane hirze . vn- andir wilt
0,32358 der zal so hohe was gezilt
0,32359 dc ir zal vnbetrachtet
0,32360 beleip . vn- gar vngahtet
0,32361 vn- an gefvigil des ovh so vil .
0,32362 wc . vzwendig der maze zil .
0,32363 dc ez nieman gahten
0,32364 kvnde noh betrachten
0,32365 ane manegir leie vische
0,32366 die man trvog ze sinim tische
0,32367 tegelih ze spise
0,32368 ovh hate der kvinig wise
0,32369 Salomon der mere
0,32370 vierzig tvsint lovfere
0,32371 ros . in sinim lande
0,32372 dvi man so snel irchande
0,32373 dc inin als warheit giht
0,32374 die lenge mohte gevolgin niht

0,32375 dewedir tal . berg . odir mos .
 0,32376 dar zvo zwelf tvsint wildvi ros
 0,32377 hat er in sinin villin
 0,32378 dvi er nah sinim willin
 0,32379 hielt . gab . vn- selbe reit .
 0,32380 als vins von im dvi warheit seit
 0,32381 Al die . die ringe mvesten gar
 0,32382 ordin . vn- ir nemin war
 0,32383 die sinir ampte solten pflegin .
 0,32384 wie wise were der gotis degin
 0,32385 dc kvindet vins dvi schrift also
 0,32386 vn- giht dc in dein ziten do
 0,32387 nieman an wisheit vollekommen
 0,32388 were . vn- an wisheit vzgenommen .
 0,32389 bi dein ziten als eman .
 0,32390 vn- einir was genant ethan .
 0,32391 vn- mit dein zwene vbir ellvi lant
 0,32392 d' name wart mir niht genant
 0,32393 ob dein wc er so wise
 0,32394 dc von dem hohin prise
 0,32395 sinir hohin wisheit
 0,32396 ir wisheit was gar geleit
 0,32397 vn- er wart an die hohsten stat .
 0,32398 vbir al der wisheit gesat
 0,32399 die man do vbir ellvi lant
 0,32400 bi dein selbin ziten vant
 0,32401 odir von dein man ie gelas
 0,32402 sin sitte . vn- sin gewonheit was
 0,32403 das er gerne tihte
 0,32404 mit tihtenne berihte
 0,32405 bispiel . vn- gvoter lere vil
 0,32406 dvi dein lviten ellvi zil
 0,32407 reht . vn- wise lere
 0,32408 hinnin fvir iemir mere
 0,32409 mit wisin Worten lere gebint
 0,32410 der gerne wisliche lebint .
 0,32411 Dar zvo hat ovh von im geseit
 0,32412 dvi schrift . das er mit warheit
 0,32413 an iegeslichir figvre
 0,32414 berihte die natvre
 0,32415 wie ez genatvrit was
 0,32416 ez were holz . wurtze . od' gras
 0,32417 niht nah menschen trovme
 0,32418 vn- von dem ersten Cedirbovme
 0,32419 den Libanvs der berg noh birt
 0,32420 vntz an dc miesch dc da wirt
 0,32421 von fvile . an einir wende
 0,32422 bericht er an ein ende

0,32423 mit wislichir vmbevart
0,32424 wie iegeslichis ding nah sinir art .
0,32425 genatvrit was vn- ist
0,32426 dar zvo beschiet sin wisir list
0,32427 wie allin lebin ir lebin
0,32428 von natvre ist gegeben
0,32429 nah sinir ordenvnge
0,32430 ovh tiht er beswervnge .
0,32431 mit der worte grozer kraft
0,32432 er zovbirte . vn- mit ir meisterschaft .